

सिद्धिरामायण


[किष्किन्धा काण्ड]



सिद्धिदास अमात्य

पासा—४०

सिद्धिरामायण



सिद्धिदास अमात्य

पिकाकः—

च्चसापासा,
५०३, केल मासंगल्ली,
काठमाडौं—१०

ह्वापां—१०००
नेपाल सम्बत्—१०८७
मू — — — १।-
सफूया हामा पिकाक

थाकः—

जोर गणेश प्रेस प्रा० लि०
बालाजु

जिमिगु खँ

महाकवि सिद्धिदासया सच्छिदै बुद्धिया उपलक्ष्ये विभिन्न सफू पिकया महाकवियात देछायेगु व महाकविया आत्मायात लयतायेकेगु खसाकथं च्वसापासा पाखें सफू धमाधम पिहां वयाच्वंगु दु । गुगुं सफू तर्पे जूगुलि ध्वायेगु ज्या जुयाच्वन । गुगुं सफू पाण्डुलिपिया रूप्य तयार जुया प्रेस्य वनेत थिक्क जुयाच्वन । गुलि सफू पिहां वल अथवा पिहां वइगु जुयाच्वन, फुक्क धयार्थे छगू थे छगू महत्वपूर्णगु जुया झीगु आवश्यकता पूर्ति जूवंगु दु, झीगु समस्या समाधान जूवंगु दु । थथे खया नं गुम्ह कवियागु सच्छिदै बुद्धि समारोह न्यायेका च्वना वयागु बासलं मयाक दुगु सफू मध्ये छगू हे नं पिमकाल कि ज्या व खँ चूमलार्थे जुइ । तर अथे मखु । महाकवियागु चिचीधंगु जक सफू मखु कि वयागु कीर्ति मध्ये आतक खनेदुगु दकले सेल्लागु, दकले तधंगु सफू -‘रामायण’- हे पिकायेगु जिमि खसा ख ।

फुक्क धयार्थे सफूया निति छम्ह छम्ह दातां मागु खर्चया अभिभारा ववुयादीथे थ्व रामायणयात नं छम्ह दातायाके हारगुहार पवनेगु ज्या जुल । वयक ख भाजु भुवनमान श्रेष्ठ, स्वर्गीय सरदार गुञ्जमान श्रेष्ठया सुपुत्र । वयकलं थ्व सफू थ स्वर्गवासी बबु सरदार गुञ्जमानया पुण्य स्मृतिइ पिकयाबीगु बिचा प्वंकादिल । थ्व वयकया थ बबु प्रति श्रद्धा भक्ति वचनेगु ज्याया नापनापं थगु भाषा प्रति दुगु माया व ममता नं ख । अले थुकि च्वसापासाया थगु उद्देश्य नं सफल जूवंगु दु । वयकया सद्भावनां याना जूवंगु थ्व थपाय्धंगु भि ज्याया निति वयकयात जिमिगु आपालं आपालं धन्यवाद दु ।

छगू खँ छु धासा रामायणथे ज्यागु महाकाव्य हथापथासं पिकयां उलि हिसि दयेक पिकाये फइमखु । हानं इलं नं भाय् मल्लाये धुकल । अथे जूगुलि आ समारोहयात लाक्क छगू काण्ड जक नि पिकायेगु जिमिसं बिचा याना । वास्तव्य थ्व छगू काण्ड हे नं जोरगणेश प्रेसया मैनेजर भाजु माधवलाल कमाचार्यया तत्परतां हे जक वाछिया भित्र्य पिकायेगु सम्भव जूगु ख, अन्यथा निरास हे जुइमालीगु अवस्था वयेधुंकुगु । अथे जूगुलि स्वर्गीय सरदार साहेवया जीवनी व किपा थ्व सफुती तयेगु धयागु जिमिगु गुगु खसा ख व आयात लिक्का लिपा मेमेगु काण्ड नं ध्वाना तर्पेक छर्पे याना पिकायेबले तयेगु बांलाइ ताया । थ्व आ ध्वानागु ‘किष्किन्धा काण्ड’ नं

ला थ्व समारोह्या भित्रय् हे फुङ्गु आपालं सम्भावना दु । लिपा मेमेगु काण्ड नं ध्वाना फुक्कं छपै याना पिकायेबलेयान थ्व काण्ड हानं अवश्य नं ध्वायेमालीतिनि । अकिं थ्व आ ध्वानागु छगू काण्डयात वयक दाता भुवनमान भाजु अर्पण यानादीगु दानया छुमां सम्म भापेगु हे बांलाइ ।

थपाय्धंगु सफू पिकयाबीत माक्को खर्चया अभिभारा कयादीम्ह भाजु भुवनमानयात जिमिगु आपालं आपालं धन्यवाद दु ।

अले प्रेसय् ध्वाकेजीक अति श्रम व समय फुका पाण्डुलिपि लह्याबिया दीह्म प्रो० जनकलाल बैद्ययात नं आपालं आपालं धन्यवाद दु । थ्व रामायण-या भूमिका नं वयकलं च्वयातया दीगु दु । तर, थ्व छगू जक काण्ड जूगुलिं थुकी मतसे लिपा फुक्कं छपै याना पिकाय बले तयेगु बिचा वयकलं प्ध्वंकादिल । थ्व बांलागु हे खँ ख ।

थगु थ्व कीर्ति प्रकाशय् वगु खना महाकवि सिद्धिदासयात आत्मसन्तोष अवश्य जुयाच्चंगु दइ धयागु आशा दु ।

२५-५-२०२४

चवसापासा

सिद्धिरामायण

सिद्धिरामायण

किष्किन्धा काण्ड

श्री गणेशाय नमो । श्री सरस्वतीभ्य नमो ।
श्री रामचन्द्राय नमो ।

पंथा सरोवर स्वया वन राम लक्ष्मण ।
पूखू खना चतकनं निहया अने मन् ॥
न्या नं खन हिसि दुपिं खन पद्म स्वां नं ।
लक्ष्मण छनं थन स्व का गुलि भिं थव थानं ॥१॥

पूखू जवो खव सिमात अती स्वभा ला ।
सीता तना दुख जुया खबि वो जि जा आ ॥
पूखू स्वया जि मनया दुख जा तनं का ।
राज् हंसनं थुगुलि दू खन जू म्हिता का ॥२॥

लक्ष्मणजियात स्व धका बनया स्वभा का ।
श्रीरामजू चवन वना खँ कना कना का ॥
ऋतू वसन्त जुल का थुगु कालया जा ।
बोया चवनं थन फये सितळं जुया जा ॥३॥

श्रीराम लक्ष्मण वनं अननं सिता मा ।
दाजू किजा निह्य जुळं फुक बन् हिला मा ॥
पर्वत ववसं थ्यन हनं ऋषिमूकया का ।
राजा दु का अन व माकलयाह्य जा का ॥४॥

सुग्रिव् धका जुजु जुळं हनुमान मंत्रि ।
 नापं च्वना च्वन अनं ऋषिमूक सत्ती ॥
 किष्कंध नाम जुल का अमि देशया जा ।
 सुग्रिव् व वालि दु निहं छह्य मामया जा ॥५॥

सुग्रिव् अती धरम चेत् दु व वालि पापि ।
 वाली व सुग्रिव निहं मि व लः थ्यं भापि ॥
 त्वाना जुई ह्निनिछि का गन धोदुळं का ।
 त्याके मफू अन व वालि व सुग्रिवं का ॥६॥

त्वाम् छको निह्य हनं धुमधाम या का ।
 बूना वनं अन व सुग्रिव वालि त्याका ॥
 वाळीं अले धन व सम्पति लूट यातं ।
 योंका बिळं वन बळं सुमुकं कलातं ॥७॥

देशं पिने पितिन सुग्रिवयात हानं ।
 वाली खना बिसि वना च्वन वो सुलातुं ॥
 वोई मखू थन धका मननं थ्व खंका ।
 सुग्रिव् च्वनं परवते ऋषिमूकसं का ॥८॥

तोता वनं फुक व चाकरनं उथासं ।
 नापं च्वनं व हनुमान् छह्य आसपासं ॥
 श्रीराम लक्ष्मण खनं अन सुग्रिवं जा ।
 वाळीं छ्वया हल धका अंति ग्यात वं जा ॥९॥

ग्यानाव सातु वन सुग्रिवया मनं जा ।
 सुर् वीर् अरिं खन जिनं धनुवान नं जा ॥
 वोया च्वनं अमिसनं परवत्तु सोया ।
 स्याके धका जित हनं हल थें सु छोया ॥१०॥

शंका वना अन व सुग्रिवनं थ्व धाळं ।
 सो हुं छनं वल व हुं खनि मागु धाळं ॥
 माहाबली व हनुमान् अति बुद्धि थूहं ।
 मालिक् स्वया टहल यायगु ज्ञान दूहं ॥११॥

आज्ञा सिरेसतु फया रुप भिक्षु जूया ।
 ब्वां ब्वां वनं व हनुमान् अति हर्ष जूया ॥
 नेनं वना अन व रामजुयागु थासं ।
 सू हां छिपि अधिक बान दु रूप नाकं ॥१२॥

क्षेत्रीपिनी रूप छिमी अति सूर जू का ।
 हीसी दु का छिमि शरिर् स्वयनं थुगू का ॥
 ग्यानं मग्या थन छिपि वल सूर जूया ।
 नायू तुतीं छिन चुया थन न्यासि जूया ॥१३॥

यानाव छि सह थनं चिकु ताप नोया ।
 छाये बनं बन हिला थन छीन वोया ॥
 सुम्कं न्यना चवन अर्थे अन रामजू नं ।
 लक्ष्मणजियात बिल का थुगु जां छगू नं ॥१४॥

ल्हाये मते थन छनं अति चर्कनं खं ।
 बोली मधूर जुयका तिनि ल्हा छनं खं ॥
 आज्ञा न्यना थुलि हनं रघुनाथजूया ।
 न्योका बिळं थन व लक्ष्मण हर्ष जूया ॥१५॥

दशरथ जुजू छहा दु कोशल देशया का ।
 काये जिपि व जुजुया निहा सो थ्वका का ॥
 पीताजिया बचननं बनवास् वया का ।
 नां राम लक्ष्मण जुळं जिमिगू धका का ॥१६॥

नापं दु का जिमि तताजु व जानकी का ।
 योंका बिळं थन खुया मदु न्हां जिपि का ॥
 माला जुया बन हिला लुयके मफू का ।
 ब्रह्मं च्वया तवगु कर्म म्हुये मफू का ॥१७॥

धाळं व लक्ष्मणजिनं हनुमान यातं ।
 जीमी दको खँखिं फुकं थन धाय गातं ॥
 ब्राह्मण् छिनं कँ जिमितं थन छाय जूया ।
 न्योका बिळं व हनुमान् अति खूश जूया ॥१८॥

सुप्रिव, धयाह्य जुजु दू ऋषिमूक् गिरीसं ।
 सोके हळं जित वनं थन थो छिमीतं ॥
 वाली खनाव अति गया उह्य शत्रु वोया ।
 छळ् वोगु ला छु थ्व धका हल का जि छोया ॥१९॥

मंत्री जि का व जुजुया हनुमान् जि नां का ।
 हे राम् छिनं जित कनं छिगुली बयान् का ॥
 खूशी जुया वल हनं जिगु मन्मनं का ।
 सुग्रीव त्वाय दयकी रघुनाथ् छिनं का ॥२०॥

माली अले वन सिता कपि फौज बीया ।
 पैगू दिशा सकभनं छु दु चिन्ह बीया ॥
 याक्नं लुई छिह्य सिता वन जुक्ति याना ।
 सुप्रिव्जियात सुख ब्यू छिन बालि स्याना ॥२१॥

बुद्धि पुराह्य हनुमाननं धा स्वया का ।
 खै का धका च्वन मनं रघुनाथया का ॥
 त्वाये चिने जिन व सुप्रिवया ननानं ।
 बोनाव योंकि छिन का जिमितं ननानं ॥२२॥

ळूकुं छितं व हनुमान्जिन राम लक्ष्मण ।
 पर्वत् मया वन अनं अति हर्ष जू मन् ॥
 सीमा क्वसं वन दिका हनुमान् ननानं ।
 सुग्रीवयात कन का फुक खं बयानं ॥२३॥

वोळं व सुग्रीव हनं मलयाचळं का ।
 नाप्ला बळं अन व रामजु झागुलि का ॥
 धाळं व सुग्रीव वया अन रामयातं ।
 नेने धुनं जिन छिगू थन थात बातं ॥२४॥

त्वाये चिने जित धका छिन झागु जूळं ।
 का सा जिनं थन फये जिगु ह्लात जूळं ॥
 जोना दिसं जित छिनं थुगु ह्ला निपासं ।
 त्वाये जुई छि व जि वो निह्म का उथासं ॥२५॥

नेनाव सुग्रीवजिनं थुलि बात ह्लागू ।
 श्रीरामचन्द्रजुन जा ज्वन ह्ला वयागू ॥
 ब्वां ब्वां वनाव हनुमानन चंख ताळं ।
 सित्वा निगू हल कया अन चूल ह्लातं ॥२६॥

चूचूं चुचूं सिं निगुलि अन मी पिकाळं ।
 छ्वेकाव मिं दिनि दिनी अनसं तु काळं ॥
 श्रीराम सुग्रीव निह्मं अति हर्ष याना ।
 चाचा उला मि अनसं तल साछि याना ॥२७॥

त्वाये चिना खुशि व सुग्रीवजी व राम ।
 याये छि वो जि व निह्मं थन न्हां प्रणाम ॥
 सुग्रीवजुनं खुशि जुया अन राम यातं ।
 आसन् बिळं थव दु थे सनमान यातं ॥२८॥

सीमा कचान लहिना बिल वास जीगू ।
 श्रीराम लक्ष्मण निहं अनसंतु दीगू ॥
 लक्ष्मणजियात बिल का हनुमाननं जा ।
 श्रीखण्ड चन्दन कचा बिल आसनं जा ॥२९॥

धाळं अले अन व सुग्रिवनं मधूरं ।
 नेना दिसं दुख जिगू थन राम सूरं ॥
 योंका बिळं जिह्वा कला जित वांछ्वया नं ।
 त्रासं चवना जि थ्व बने अति दू सियानं ॥३०॥

न्हि न्हिं मंछि स्व थनं नुगळं सदानं ।
 न्हेळं मवो जि नुगले खँ दयाव हानं ॥
 ग्याना जुया थरथरं जित वं मयोया ।
 दाजू व या जिह्वा जुळं 'छह्वा हे व ज या ॥३१॥

युक्ती छिनं थनस या फुडूगू व बाली ।
 श्रीरामजूं अन न्हिला मुसुहुंन धाळं ॥
 त्वायेजुनं अन न्हिला मुसुहुंन धाळं ।
 त्वायेजु सुग्रिव छिगू जिन दुःख्ख सीळं ॥३२॥

बळजफ्तिनं छिह्वा कला यन वं स्व वोया
 म्वाये दर्ईमखु थनं वल काल वोया ॥
 च्वामूगु वाण जिगु का मकसें मदीहं ।
 लेनी मखू उह्वा थनं सहजं व सीहं ॥३३॥

सोये दर्ई छिन थनं उह्वा वालि सीगू ।
 पर्वत् समान् खनि हनं बैस गोतुलीगू ॥
 श्रीरामजुया हित वचन् अनसं न्यनाओ ।
 खूशी व सुग्रिव अती मनमन् न्हिलानो ॥३४॥

हे रामजी जित थनं छिगुली दयानं ।
 राजे कला जित हनं दइ खे स्वया नं ॥
 वाळीं जितं दुख बिये मफुगू छिनं या ।
 निर्धा खना जित कृपा अधिकं थनंया ॥३५॥

छीगू दुखं जित जुळं जिगु नं स्व छीगू ।
 नेना जिनं छिगु दुखं हनुमान्न कंगू ॥
 जोगे मजू छिन थर्थे थन शोक याये ।
 त्वाये फको जिन छित थन हीत याये ॥३६॥

योंका बिळं छि नकि नं निशिचर्न खूया ।
 नेना जिनं थुगु धका रघुनाथजूया ॥
 योंका बिळं छिहा सिता निशिचर्न खूया ।
 माला जुया थन बने गननं मळूया ॥३७॥

थूली वचन् अन न्यना रघुनाथयागू ।
 सुप्रिर्वजिनं कन व जानकिया खँ मागू ॥
 हे राम् ! छको जिन खनं ऋषिमूक्स चोना ।^१
 'हा राम् !' धका जक व खो अधिकं ववछूना ॥३८॥

आकाशसं चवन वना अति वेग याना ।
 झाळं तिसा थ्व कुतिका थन पोल याना ॥
 सोया दिसं छिन छको छु छु पो थ्व फेना ।
 सुप्रिर्वजिनं थुलि धया अन पोल ^३फेना ॥३९॥

केना बिळं फुक उला भुमिसं तयावो ।
 श्री रामजी खवल अती व तिसा स्वयावो ॥
 आज्ञा जुळं अन हनं रघूनाथ् खयानं ।
 सीतां थनं छु छु तिसा कुतिकूगु या नं ॥४०॥

लक्ष्मण् स्व का थन छनं छुछु दू वयागू ।
 नेना थुली अन वचन् रघुनाथयागू ॥
 स्यूगू तिसा अन व लक्ष्मणनं कने धा ।
 मेता मखं जिन तिसा थन जि कने का ॥४१॥

सीताजिया तुति जिनं अनियाजुया का ।
 पायो छजू जिन सिया मनसं लुया का ॥
 सोया तिसा हन हनं अति शोक या झं ।
 खोया चवनं अन सिता धक राम लक्ष्मण् ॥४२॥

शोक् या खना अन व सुग्रिवजीन धाळं ।
 हे राम् छि जा सकल शास्त्रत पार या ह्यं ॥
 छी जा जुळं थन अती तबधं महात्मा ।
 शोक् यायमा जिमिसनं अति मूढ आत्मा ॥४३॥

तंका दिसं थन छिनं थुगु शोक यातं ।
 याकी मखू सुख वनं गन शोक यातं ॥
 त्वाये जुया जिन धया उपदेश् मयाना ।
 धीर्जे पिका थन छिनं फुक शोक वाना ॥४४॥

श्रीरामनं अन सुग्रिवया खं नेना ।
 मोखास खोबि हुल का अन बस्त्र येना ॥
 खूशी जुवा मन मनं अति धिर्ज याना ।
 त्वायेजु सुग्रिव लिसे अति प्रेम याना ॥४५॥

सुग्रीव सखा जित छिनं अति हीत या का ।
 हेका दिया थन छिनं बिल धिर्ज याका ॥
 छीथेह्य बन्धु दइगू जित दुळंशं का ।
 सीताजि माल्यगु छिनं थन युक्ति नं या ॥४६॥

याना जिनं थन तया कबुळं थवका का ।
 वाली फुका छित जिनं सुख बी धका का ॥
 सत्ये जिनं थन तये छिन न्यो ह्ति त्वाये ।
 पाफेक्क^६ धून जिन जा मखु झूठ याये ॥४७॥

श्रीराम सुग्रिव छको च्वन का व मूना ।
 ह्लाना दिळं खँ निहयां सुख दुःख मूना ॥
 खूशी जुळं अन व सुग्रिवजी स्व योक्वं ।
 श्रीरामजुया खँ खिँ न्यना तनका व शोकं ॥४८॥

खूशी जुया अन व सुग्रिव मग्न जूळं ।
 हे राम् छिथींह्य गुणवान् जिमि त्वाय् जूळं ॥
 सूखी^७ दुखी जुवहणं धन थू मथूसां ।
 त्वाये धका मनमनं सम याय जूसां ॥४९॥

याये छु छू थमन फू उगु वैत याये ।
 उमनं फको जिह्य सखा धक हीत याये ॥
 सुग्रिवजिया थुलि बचन् न्यन रामया नं ।
 खूशी जुयाव रघुनाथन धाल हानं ॥५०॥

त्वाये छिनं थन यथार्थन थौं खँ ह्लातं ।
 खूशी जुया अन व सुग्रिवनं थव यातं ॥
 श्रीराम चन्द्र भुमिसं दिवगू खनावो ।
 स्वां होगु वास उकिसं भबळं भुनावो ॥५१॥

चोंगू हया बिल अनं सुमुकं वनावो ।
 सीमा कचा त्वक थुला अनसं हयावो ॥
 श्रीरामयात बिल का दिसँ छी धकावो ।
 सुग्रिवजिनं च्वन उकी सुमुकं वनावो ॥५२॥

लक्ष्मण् बँसं व दिलगू हनुमान् खंका ।
 झत् तोथुला बिल कचा अन धुंसि खंका ॥
 आसन् धका बिल अनं हनुमान वोना ।
 खूशी जुया चवन व लक्ष्मणजीन वोना ॥५३॥

आनंदया मन कया दिल रामया का ।
 सुग्रिवजिनं अति खुंशि विनती थव या का ॥
 खोबी मिखान पिकया अन सुग्रिवं जा ।
 धाळं व रामजु स्वया थव दुःखनं जा ॥५४॥

वालिं जितं सह मया अति शत्रु खं जी ।
 योंका बिळं जिमि कला पितिनं हनं जी ॥
 चोना जिनं भय कया ऋषिमूक् गिरीसं ।
 फूका दिसं थन जिगू दुख आ स्व छीसं ॥५५॥

नेना बचन् थुलित सुग्रिवजीन धागू ।
 तेजस्वि रामजु ह्लिला अनसं थुजागू ॥
 आज्ञा जुळं अन व सुग्रिवजीतु सोया ।
 स्याये व वालि जिन जा छिन दीसं सोया ॥५६॥

चवामू थव वाण अधिकं वनि वजू वंथें ।
 वैका हनं अन कया जिन तातुनार्थें ॥
 पापी व बालि अवसें सिङ्गू व खं का ।
 सुग्रिवजि जा अति खुशी अनसं जुळं का ॥५७॥

हे राम चन्द्र जि चवना मन खुप् मछिका ।
 त्वाये चिना छि व जि वो अति प्रेमानं का ॥
 न्योंके जिनं थन छितं जिगु दुःख यागू ।
 धर्धर् मिखां खवि वळं अनसं बयागू ॥५८॥

सुग्रिवजिया धिरजनं खवबि वं मवेका ।
 मीखा हुया सुमुकनं चवन वो अथे का ॥
 धाळं व रामजु स्वया नुगळं मछिका ।
 हे राम् छिनं दुख फुकी उह्य बालि छि स्या ॥५९॥

संक्षेपनं छित कना खँ कनां मब्या का ।
 सुग्रिवजिया थुलि बचन् दुखया न्यना का ॥
 श्रीराम चन्द्रन हनं न्यन खं वयागू ।
 कारण् कँ का जित छिनं थन वैर यगू ॥६०॥

याये अले तिनि जिनं छिगु ज्या गथिगू ।
 नेना छिगू दुख थनं नुगळं मछिगू ॥
 लहाना फई मखु हनं जिन जा स्व त्वाये ।
 जोनं मल्हों गुलि धनू उलितं स्व त्वाये ॥६१॥

न्यंका दिसं छिगु वृत्तान्त हया खँ झत्तं ।
 तोता बिये जिन अले थुगु वाण झत्तं ॥
 बाली सिनाव थननं वनि प्राण नं का ।
 काये मते छिन थुली मजुईगु शङ्का ॥६२॥

धागू न्यनाव थुलि का रघुनाथजून ।
 सुग्रिवजिया अति खुशीं प्यह्य मन्त्रि मूना ॥
 मन् खुप् प्रसन्न जुयका अन सुग्रिवं जा ।
 श्रीरामयात कन्यगू मन यात वं जा ॥६३॥

आरंभयात अनसं रिपु वालि जूगू ।
 सुग्रिवजिनं कन अनं थव दुख्ख जूगू ॥
 दाजू व बालि जि लिसे अति प्रेम या का ।
 पीता सिना वन लिपा जित शत्रु या का ॥६४॥

मंत्रीपिसं जुजु बिळं उह्य वालि यातं ।
 च्योथें जुया जिन च्वना फय माल लातं ॥
 ल्वाये धका बल छको अन वालि लीसे ।
 मायावि धाहा अन दानव बोल सीसैं ॥६५॥

किष्किन्धा पुरिसं छको बल व जा मायावि ल्वाये धका ।
 न्हो वो का जिमिजा व रात्रिस अनं ल्वा वाछ वाली धका ॥
 हाक् याना अति चंचळं जुल व जा सूरा जुया मन्मनं ।
 दाजू वालि हनं छनाव च्वनहं राक्षेस हा शब्दनं ॥६६॥

ब्वां ब्वां नं वन का अती रिस कया स्याये त्यनं वैत का ।
 हेका काव जिनं मिसात सकळं स्याये मते छि धका ॥
 क्षेमा वं मतळं अती बल दया मुर्कोन दाया बिळं ।
 मायां दाजु धका वना जि व लिसैं मायावि जा लीचिळं ॥६७॥

वाली वोगु खना जिनं दुगु खना लीली चिलावो वनं ।
 ग्यानावो अति वेगनं विसि वनं मायावि जा त्रासनं ॥
 लीना का जिमिसं वनी गन गनं ल्यूल्हू वनावो अनं ।
 बवं खंकल वं गुफा छगुलि नं द्वाहा अनं झत् वनं ॥६८॥

गूफायागु पिने च्वनाव जिमिसं अर्थें दना तुं अनं ।
 द्वाहा वोगु खना व शत्रु अनसं वाली अती क्रोधनं ॥
 धाळं का अनसं व दाजुन जितं कीजा छनं न्यो थनं ।
 स्याना वे थनसं गुफास जि वना पीया च्वं का छं थनं ॥६९॥

जीनं वे छि लिसैं धका जिन धयां बोना मज्जो वं जितं ।
 द्वाहां वालि वनं गुफास सुमुकं पीने तयावो जितं ॥
 चोंचों जी अनसं दछीत पुल का वोनं जिके थो मती ।
 दाजू सीत धका मछीन नुगळं व्याकुळ जुळं का अती ॥७०॥

चोना जी अनसं थुगू मन कया प्वाळं हि बा वोल का ।
 वो सोया जि मनं अधीक मछिनं जी नं स्व ग्याना वळं ॥
 राक्षेस् हाल अनं अती ततसळं वाली महाळं अनं ।
 सीका जीन उकीं व वालि सित का स्याई जितं जा खनं ॥७१॥

गूफा प्वाल तिना त्वहूत छगळं जीनं उकीसं हया ।
 हानं मोल ल्हया व दाजु सिइया ल्याहां जि देशं वया ॥
 वाली सीगु जिनं कनान मबिया तोनं पुया जीं तया ।
 सीका काल व मंत्रीपीं सकलनं वाली सितं खै धका ॥७२॥

मंत्रीपीं सकळें मुनाव थन जा राजे बिळं का जितं ।
 इच्छा जीत मजू जुजू जुय हनं नेना अमी खं जिनं ॥
 याना राज्य अनं निसाप दयका पर्जा लहीना तया ।
 वोळं वालि लिपा व दानव फुका चोनं व छेसं वया ॥७३॥

गद्दीसं जित चोंगु वों खन अले तंचाल का जी खना ।
 मंत्रीपित वनं तमं क्यन हनं सास्तीन यातं वना ॥
 हेराम्चन्द्र जिके दु का स्व वलनं वो वालि जीं ची फुका ।
 याये जिं मफयाव दाजु अपमान् क्षेमा जिके वोगु का ॥७४॥

वोया शत्रु फुका लिहां व थनसं सन्मान याना जिनं ।
 भो भो जीन पुया तुतीस अधिकं याना प्रणामं जिनं ॥
 आशीर्वाद जितं मबील वन जा ख्वा नं मसो वं तमं ।
 न्हीन्हीं जी अनि यावना चरणसं वोयाक्य रीसं मतं ॥७५॥

क्रोधं चोन धका स्यवा जिन जुया खूशी जुईला धका ।
 याना बित्ति जिनं व दाजु तु स्वया रक्षा जितं या धका ॥
 जीमी भाग्य वळं फुकाव रिपु छि ल्याहां थनं झाल का ॥
 छत्रं चामर छि कया दिसं थुगू तोता बिये जिं थ्व का ॥७६॥

हे राजन् जि चवना छिगू हुकुमनं गूफास पीया अनं ।
 चोना जीं दछितं पिया छित अनं न्ह्याना वळं ही हनं ॥
 ग्यातं का अन जी अती थरररं गूफा त्वहंतं तिना ।
 किष्किन्धा पुरिसं वयाव जि चवना सुम्कं म्हुतू जिं तिना ॥७७॥

मंत्री आदि मुना जुजू बिल जितं इच्छा मद्दू का जिके ।
 जूजू जूय धुनं लिकाय मजिळं फोना क्षमा जि छिके ॥
 न्हापायाथ्य छिनं जुना दिसं जुजू चाकर् जुयेका जिनं ।
 जूया जी जुजु का छि जा मदु बले आ जीन तोते छितं ॥७८॥

न्हापाथें दनि का व मंत्रि सकळें शत्रू मद्दू सुं थनं ।
 नासो जीन कया छिगू मुलुक जा लीतं बिये जि हनं ॥
 याना विन्ति जिनं छिके स्व न्हिनछि देश्या व मंत्रीपिसं ।
 राजा जा जित यात का अमिसनं काई धका मेपिसं ॥७९॥

हे रामचन्द्र जिनं मधूर वचनं न्ह्याको खँ ह्लासां हनं ।
 वो वालि अपमान् क्यनं जित अती धिक्कार यातं वनं ॥
 मंत्री आदि वया गुली जवखवं चाकर्त मुंके बिळं ।
 भाई बन्धुपिनी दथूस जितया थोयोगु वं बोबिळं ॥८०॥

पर्जापीत कनं व वालिन हनं मायावि वोगू खँ नं ।
 चान्हे त्वावल का व राक्षस हनं यानाव हाँकं थनं ॥
 त्वा वा वालि धका धयाव व चवनं नेना जिनं ब्वांवना ।
 लीना का जिमिसं अधिक रिसनं राक्षेस यातं वना ॥८१॥

राक्षेस् बीसि वनं अती भय कया ल्यू वो खना वैत नं ।
 गूफासं वन का दुहां व सुमुकं तं जा म्वळं जी हनं ॥
 कीजायात धया पिया च्वं वन छं द्वाहा वने जीं धया ।
 पीया चोंथन जी गुलीत मवई सुग्रिव् किजा न्हां धका ॥८२॥

चोनं का अनसं व सुग्रिव दना प्वाले जि द्वाहा वना ।
मामां जीन वना दछी अन पुळं राक्षेस् अनं जीं खना ॥
स्याना जीन अनं खनेव अमितं वन्धू समेतं फुकं ।
चिल्ले यात वनं भयानक सळं संकष्ट जूया मुकं ॥८३॥

बोयागू म्हुतुनं हि न्ह्यात अधिकं गूफा जुळं ही जकं ।
स्याना शत्रु जिनं अती हरषनं गूफां वया वे धकं ॥
गूफा प्वाल तिना तळं अन हनं तग्गोगु लोहं हया ।
सुग्रिव सुग्रिव तू धया बलबळं हालाव जी जा वया ॥८४॥

हा ही सुं मदु का जि दू थन धका दू ताल का जी मनं ।
प्यंका जि बलनं व ळोंहें लिकया ल्याहां वया जी थनं ॥
लोभी सुग्रिवनं गुफास जि कुना राजा जुयावो चवनं ।
बोळं क्रोध जिके अधीक थन जा सुग्रिव खनावो हनं ॥८५॥

जूजू माकलया व बालिन जितं यानाव हेला अने ।
धोतीचा छपुनं चिकाव पितिनं छेनं जि का थो बने ॥
हे राम्चन्द्र थनं कलात जिह्म नं दायाव या सास्तिनं ।
बोया जी बिसिनं भये अति कया वाली खनावो जिनं ॥८६॥

हीला जूय धुनं भुमी सकभनं चोने मफू जी गनं ।
नारी योंकुगुळीं अती दुख जुया चोना जिनं का थनं ॥
हे नाथ जी ऋष्यमूक पर्वत वया सीयू धका बालि कः ।
श्रापं क्योंगु दु का मतंग ऋषिया ऊर्किं मवो बालि का ॥८७॥

हेराम् जी थन जा कने धुन फुकं बाली रिपू जूगु नं ।
सोया दीसैं छिनं जिगू छु अपराध् अप्राध् मद्द जी छुनं ॥
दू स्यगू जिन जा लनां मफू लने जीनं गुलीतं कने ।
फूका बीह्वा छि जा भये सकलया फूका भये जीं चवने ॥८८॥

धागू सुप्रिवनं न्यनाव रघुनाथ् ह्लीलाव धाळं हनं ।
 त्वाये जिं कयके थ्व वाण थनसं तोते मखू जीं वनं ॥
 म्वाई बालि उली जिनं व मखनी भाय्या छिह्नां योंकुहां ।
 स्यूका जिं अनुमाननं छिगु दुखं शोक् खूसिसं दुंकुहां ॥८९॥

छीगू राज्य जिनं बिये स्व लिकया उद्धार याये खतं ।
 श्रीराम्चन्द्रजिनं अती भर बिया धागू न्यना तच्चतं ॥
 सुप्रिव् हर्ष जुया वना च्वन अनं बळ् याह्म बाली जुया ।
 बळ्यागू ममतां लिना जुल सिमा योगू बनेसं जुया ॥९०॥

राक्षेस् दुंदुभि ल्वावनं बल दया दोछी किसीया दुती ।
 धर्मात्मा हिमवान् स्वयाव व वनं त्वायेत नं बळ् दुती ॥
 पर्वत्राज हिमालयं अन कनं बोली मधूरं कया ।
 त्वाये जी मफु का बळं जि मदु का आश्रम् जि जा जोगया ॥९१॥

धाळं दुंदुभिनं कँसा जित छनं त्वाये सुलीसें थनं ।
 किष्किन्धा पुरिसं दु का अन छह्नां बाली धयाह्नां हनं ॥
 पर्वत्राज हिमालयेन थ्व कनावो दुंदुभीया तमं ।
 किष्किन्धा पुरिसं वनाव व च्वनं त्वाये धकावो थमं ॥९२॥

त्वातं वालि लिसें अती तवच्चतं जुद्धं अघोर् यात का ।
 जोना दुंदुभियात जा अन बळं बालीन वो स्यात का ॥
 ही बा न्ह्यात वया ह्मनं धरररं फुक्कं गुंगू द्वारनं ।
 गोतूळं बयसं सितं व असुरं त्यातं व बाली अनं ॥९३॥

दैत्ये सीह्म ज्वनाव बालिन हनं हीकाव वांछो जुळं ।
 वोनं तिग न्ह्याव योजन छगू चीची दना ही म्हुळं ॥
 थोया हीं कल का मतंग मुनिया आश्रम्स वोना हनं ।
 बीचार् यात अनं मतंग मुनिनं वोळं धका ही गनं ॥९४॥

सू मूढं जित थौं हिनं कयकळं थूली धयावो वनं ।
 पर्वत्थे चवनकं व मे छह्य सिना च्वंगू भुमीसं खनं ॥
 सीका काल वनं तपोबल दया बालीन यागू धका ।
 बीळं श्राप वनं सुनां हि म्हुकळं वोयात जा थो धका ॥१५॥

सीमा वेव थनं व माकलत नं पर्वत् प्यक्वे पाक नं ।
 वोया मन्त्रि सखा जि थास गननं वेवं सिईमा हनं ॥
 कायेथे जिमनं बिचा थव वन जि याना ववोना हनं ।
 वाली वैगु मयो सिमा व्छइ लिना फळफुळ् फुई का हनं ॥१६॥

ग्याना माकलतं बिसी वन अनं केनीन श्रापं धका ।
 किष्किन्धा पुरिसं मुनाव वन का ल्हाये खँ जूगू धका ॥
 वाली छीत थनं मतंग मुनिनं बीळं स्व श्रापं हनं ।
 पर्जां धागु न्यना मतंग मुनिया न्होने वना धावनं ॥१७॥

वाळीं धागु मन्यों मतंग मुनिनं आश्रम्स सुम्कं वनं ।
 श्रापं केन धकाव वालि अधिकं ब्याकुळ जुयावो चवनं ॥
 हे राम्चन्द्र हनं व श्राप-वशनं वाली मवो का थनं ।
 मोखानं मव्वळं सियाव वन थो ऋष्ये मुकेसं हनं ॥१८॥

हे राम्जी थनसं चवना मन थिरं मंत्री सहीतं हनं ।
 सोया दीसँ छिनं व दुंदुभि सिना कोजो दनीका थनं ॥
 पर्वत्थे चवन का व वालि बिर नं वांछोगु का वेगनं ।
 बल्ला वालि अती स्वया दिसँ छिनं ल्लाना मव्याका थनं ॥१९॥

धुंसीमा ह्यमा छथासतु चिना संकेफु वं पो ज्वना ।
 हे राम्चन्द्रव वालि जा अधिकनं बळ्वान् खना जी चवना ॥
 ल्वाये छि फइला व लिस्य बलनं त्याकी मखंका जि नं ।
 सुग्रीवं थुलि धा खना अन ह्लिजा धाळं व लक्ष्म ण्जिनं ॥१००॥

श्रीराम्चन्द्रजुनं छु याय मफु का धाधागु यायेफु का ।
 वाळीं जा सनके सिमा सकभनं जोनाछमानं फु का ॥
 हे राम्चन्द्र छको कयेकि थन वाण् तोथू सिमा हुं छिनं ।
 वो मे सीहासया क्वञ्जे छिगु तुतिं श्वानाव छो का छिनं ॥१०१॥

वाली सीगु खने अले तिनि जिनं लक्ष्मणजि धाळं वनं ।
 लक्ष्मण्यात थथे धयाव अनसं धाळं व राम्यात नं ॥
 त्याके फेंगु जिनं व वालि मखनावो का जि ग्याना मनं ।
 लोमंके मफु जीं वयागु बल जा चींचीं वनं जी ह्य नं ॥१०२॥

चोना जी ऋषिमूक पर्वतस का मंत्रीत मूना जिनं ।
 त्वाये सुग्रिवया न्यना थुलि वचन् आज्ञा जुळं राम्जिनं ।
 राजा माकलया छिनं स्व जिगु बळ केने छितं थौं जिनं ॥
 सुग्रिव्यात थथे धयाव अनसं श्वातं तुतीं रामनं ॥१०३॥

वोनं दुंदुभि जा व योजन झिगू चागो थ्यं वेगं हनं ।
 वांछोगू व स्वयाव सुग्रिवजिनं धाळं मधूरं हनं ॥
 त्वाये राम छिनं न्यना दिसं थनं न्हापा श्वइयातू अती ।
 तच्चो बळ पिकयाव वालिन व वानंछोबले प्या अती ॥१०४॥

हे राम् दुंदुभि जा गनाव चवन का ला ही फुना क्वे जुया ।
 आ जा याउँल का फये सम जुया वोनं उकीं तिन्हुया ॥
 याउंकं व्छत का मतू बल छि जा कष्टं मजू का छितं ।
 हे राघव् छिन वांछया दिल व जा वालीन वांछोतितं ॥१०५॥

छी वो वालि निहां सुया बल उपो जीनं मसीया थनं ।
 श्यातूई मखु का गनेव छु खुनूं याउंस्य चोनी वनं ॥
 शंका जी दनि का मखंनि थनसं वाली बुकी जी मनं ।
 का सा छि कयकी छथून न्हयमा साळ्या सिमा वाणनं ॥१०६॥

शंका जी वनि का अले तिनि थनं सीगू खने वालि नं ।
 त्वाये सुग्रिवया प्रतीत मजुया बळ् वैत केना बिळं ॥
 श्रीरामचन्द्रजुनं कयेकल अनं सालाव वाण् वेगनं ।
 ताळ् वृक्षे न्हयमा छथुं कय धुना प्वागंक पर्वत् हनं ॥१०७॥

वो सीमा न्हयमां त्वथुल्य धुन का हीतूहिला वाण जा ।
 ल्याहां बोल हनं व रामतु स्वया चोनं व थोक्रास जा ॥
 सुग्रिवनं खन का व राघवजिया बळ्या प्रतापं अनं ।
 तोतोथूगु खना सिमा छकलनं आसय्य चाया च्वनं ॥१०८॥

सुग्रिवनं अनियात का खुशि जुया श्रीरामयातं अनं ।
 ज्या सोया रघुनाथया अन वनं वाली बुकीगू खनं ॥
 धर्मात्मा रघुनाथ छीन अवसैं स्याई खनं वालि जा ।
 इन्द्रादी फुक देवतां फइ मखू ल्वानाव त्याके छि जा ॥१०९॥

वाली जा फुकि का छिनं सहजनं लेनी मखं का जिनं ।
 ताळं तोथुल का छकोलन फुकं न्हेमा सिमा जा छिनं ॥
 वो हे वाण छथू सिमा व परवत् क्योंकं कया वाण् वळं ।
 ऊंकिं जिं सिल का छितं फइमखू त्याके सुनानं बळं ॥११०॥

हे रामचन्द्र जिनं छिके स्व विनती स्याना दिसं वालि का ।
 नेना सुग्रिवया वचन् थुलि अनं आज्ञा जुळं रामजिया ॥
 हे सुग्रिव् छ व जी हथासन तुसा ज्या मेगु छि वां छ्वया ।
 किष्किन्धा पुरिसं वनाव सलती बाली छ ल्वावा धया ॥१११॥

श्रीरामचन्द्र वनं थुली अन धया सुग्रीव नापं हनं ।
 चोनं राम सुला सिमान कितका दीळं दनावो अनं ॥
 सुग्रिवजीन अले अती सुर जुया लळीं मुना वोन का ।
 हाला तिन्हुल का अघोर शबदं ल्वावा छ वाली धका ॥११२॥

कीजा सुग्रिव हागु ताल अधिकं वोळं व वाली अनं ।
 वेगं ब्वांवल का व वालि रिपु नं त्वाये धका क्रोधनं ॥
 त्वातं सुग्रिव वो व वालि अनसं जुद्धं अघोरं जुळं ।
 मुक्का मुक्कि कळं बळं फुछि अनं निहोसया का जुळं ॥११३॥

वाली सुग्रिवया दुरुस्त अनुवार् खंका कयावो मगं ।
 अंदोळ् चित्त जुया रघूकुलमणीं तोता मछो वाण नं ॥
 सुम्कं च्वंगु खनाव राघव अनं सुग्रीव जा ब्वां वळं ।
 श्रीरामजू मखना हथासन वनावो ऋष्यमूके गळं ॥११४॥

लज्यां कोछुत का व सुग्रिव अनं धाळं मधूरं वनं ।
 केनं बळ् जित छि हयाव सलता त्वावा धया जि थनं ॥
 त्वाका छि जित नं तमास स्वत का छुं हे मयासैं अर्थे ।
 सैंसैंमिक धया च्वनं वन स्वया छोतं जितं स्याक्यर्थे ॥११५॥

बज्रं कैथ्यं कळं वनं थव नुगळे मुर्कीन दाया हळं ।
 म्हूतुं छोम्हुत ही जिके स्व थन छीं पक्षे मजू छी थनं ॥
 छाये छि मधया व वालि थन जि स्याये मफू त्हां धका ।
 वोने जी मखु का थनं अनस जा त्वावा छ वाली धका ॥११६॥

सुग्रीवं कन का अती दुखि जुया धाळं न्यना रामनं ।
 बाण् तोते मफु जि छिमी निह्माउर्थे लळीं व रूप् थो फुकं ॥
 त्वाये सुग्रिव छी तमं दियमते कारण् कने का थनं ।
 सीके जि मफुतं थव हे धक जिनां ऊर्थे निहोस्यां फुकं ॥११७॥

तोते जि मफुका थव बाण अनसं तोतेव कैगू खना ।
 तोता जा छ्वयका छितं तु कल सा सेनीगु जि ज्या खना ॥
 सीतामालि सुनां छि राज्य गन दै कारण् थुगू जि खना ।
 हे सुग्रिव् जित नं खनी मुख का लोकं कनी का वना ॥११८॥

त्वाये स्यात् धका उजार जुड़ का पापं पुनी का जिके ।
 थोनं छि सियकी स्व लक्ष्मण सिता जीनं कया वर छिके ॥
 धन्दा काय मते हूँ त्वाहुँ थन छि शंका छिनं वांछवया ।
 छिन्भर्या भितके व वालि थनसं गोतूलि वाणं कया ॥११९॥

चीं ती छीं ह्यस छुं हयाव थनसं त्वायेत वोने अनं ।
 का का लक्ष्मण हुं ववखाकि वइतं स्वांमा नस्वागू अनं ॥
 लक्ष्मणजीन अले कया हल अनं स्वांमा बनेसं वना ।
 सुग्रिव्या गलसं ववखाकल वया खूशी जुळं स्वां खना ॥१२०॥

श्रीराम्यागु वचन सिरिसतु फया वोने धकावो वनं ।
 किष्किन्धा पुरिसं व राम सहितं सुग्रीव त्वा जा वनं ॥
 न्ह्योन्ह्यो सुग्रिवजी वनं लिउलिऊलक्ष्मण् व रामजी वनं ।
 ल्यूनेसं चवन का व वीर हनुमान् मेपि दु का फौजनं ॥१२१॥

किष्किन्धा पुरिसं वनाव चवन का सीमां किकावो अनं ।
 श्रीरामचन्द्रजियात धाल अनसं सुग्रीवजीनं हनं ॥
 बाली स्याथ धका वया दिल छिनं याक्नं व या का थनं ।
 सुग्रिव्या खँ न्यना जवाफ् थुगु रघूनाथं बिळं का अनं ॥१२२॥

बाली म्वाइ मखू अवश्य सिइ का सत्ये थव याना चवना ।
 देला धर्म धकं छु लालच जिके ग्याना जिनं पाप् खना ॥
 याये पूर्ण जिनं छितं रिस फुका तोती छिनं शोक् थनं ।
 त्वाहुं वालि लिसे सुरा अति जुया हाला हूँ वेगं हनं ॥१२३॥

वै का बालि अले रिसं व अनसं त्वाये धकावो अनं ।
 नेना श्री रघुनाथया थुलि वचन् विश्वासयाना मनं ॥
 सुग्रिव् त्वावन का भयानक सळं हालाव व्वांव्वां अनं ।
 बाळीं ताल अले व हागु शबदं घन्घोर याना अनं ॥१२४॥

क्रोधं मत्त जुयाव वालि अनसं ह्लेयाव वा कत्ततं ।
 मीखा ह्याउँकनं कना अन मिथें वोने त्यनं हत्पतं ॥
 तारां धाल अले मधूर वचनं स्वामी छु याना छिनं ।
 क्रोधं ब्वायमते भती धिरज या ज्ञायेमते त्वा छिनं ॥१२५॥

दाया छोट छिनं हि ह्लोक थनसं सुग्रिव् बुनावो वनं ।
 वो हे त्वावल का अतो सुर जुया सुरसार् पिकाया मनं ॥
 शंका दू जि मने छु कारण दु थें सुग्रीव वोगू थनं ।
 पक्षे सुं मदु सा व त्वावइ गनं यानाव गर्व थनं ॥१२६॥

सुग्रिव्जी अति चंख का थन चवके बुद्धिं वया दू हनं ।
 हे स्वामी जित अंगदं छन्हू कनं छीतं कने न्यों थनं ॥
 जूई का छित हीत नं थुगु खनं नेना दिसं छि थनं ।
 डुळ्फिळ् यावन का व अंगद छको मज्जां बनेसं गनं ॥१२७॥

अयोध्याया राजा दशरथजिया काय निह्याया ।
 अमी नां राम् लक्ष्मण् थुगु बनस वोयाव चवन का ॥
 सहाये सुग्रीवं अमित अन काळं विर जुया ।
 प्रतिज्ञा यानावो चवन उह्य व रामं थन वया ॥१२८॥

मते याये वैरी रघुकुल मणीया छिन थनं ।
 मखं जीनं त्याई जुइ मखु स्व मङ्गळ् हनं ॥
 मयाना निन्दा जि छिगु हित स्वयावो जिन धया ।
 जिगू खं नेना छि धिरज थन वेकी मन तया ॥१२९॥

किजा सुग्रिव् छि जा लहिय थन मा का वइत जा ।
 थवो ला ही वो जा विनति थन याना छित थव जा ॥
 मखं जीनं मङ्गळ् वइरि उम्ह याना थन हनं ।
 थव वो मांषि वैतं सुख दुख समान् या छिन थनं ॥१३०॥

जिगू खं न्यँसा छि हकि थन व कीजा अन वना ।
तमं जूसा जूनी भिनि मखु छितं जा अन वना ॥
विरोध् यार्ये थिक्कै रघुकुल मणीया थन छिनं ।
चवनं हेका तारां विनति अन यानाव फछिनं ॥१३१॥

मन्यो वारिं छत्तां उलि मछि खँ ह्लासां अन वना ।
विनाश्या काले जा गन वइ स्व बुद्धी भिन अनं ॥
खँ ह्लागू तारानं वन अनस वेथं फुक हनं ।
मसीळं तारा छं मभिन अति कीजा जिन खनं ॥१३२॥

वळं हाता व्वांवां गरव अति याना थन वनं ।
चवनेगू नं धिक्कार् जिन अन मवसे थनसनं ॥
मखू काये प्राणं जिन अन वनावो वइगु का ।
फुके का वोयागू गरव जिन वोना अन तु का ॥१३३॥

वये म्वा तारा छं सुमुक रनवासं हुनि छ नं ।
थुली धागू नेना वन व अनियाना सुमुकनं ॥
थवो छें वोनावो चवन धिरज याना मन मनं ।
वनं वाली क्रोधं अति सुर जुयावो वन अनं ॥१३४॥

मिखा हीका सोतं सकभन व वारिं अन वना ।
खनं सुग्रिव्यातं सनमुखस चोंगू अनदना ॥
दनं ह्ल्योने वाली अति सुर जुयावो मनमिनं ।
चवनं याना ताकं इसथिस निहोस्यां मुरकिनं ॥१३५॥

धया चोनं वारिं मुरकिन स्व स्याये छनत नं ।
वनी का छं प्राणं जिन छकल दाया छूयव नं ॥
थुली वारिं धागू न्यन अन व सुग्रिव्जिन जुळं ।
अती क्रोध् यानावो क्यन अनस मुर्की थवगु नं ॥१३६॥

अले वाळीं क्रोधं नकल छथु मुर्को झत अनं ।
 कयावो सुग्रिव् जा भुमिस तुल गोळं छकलनं ॥
 हिया धारा ह्वातातं म्हुतुन हिति हाथें भलभळं ।
 दना झततं हानं कयकल सिमानं चतचतं ॥१३७॥

बराबर् चोत् बीळं इसथिस निहोस्यां बल दुती ।
 बली जू झन् वाली निरबलि व सुग्रिव् वन कुती ॥
 वनं शक्ती फूना मफुत वन त्वाये मनमनं ।
 सिमा लोहं चांचि कयकल धराधर् अन वनं ॥१३८॥

रधूनाथं खंके धक मन तयावो जक सनं ।
 कची घा निहोस्यां धरधर हि वोया च्वन म्हनं ॥
 च्वनं हाला घोरं घननन न न्याथें ततसळं ।
 अशक्तं जूयावो अन थन स्वयावो जक सनं ॥१३९॥

खना सुग्रिव् ग्यागू रघुकुल मणीनं अन हनं ।
 फुके इच्छा याना स्वत अनस वाणं हनहनं ॥
 प्रहार यातं वाणं रघुकुल मणीं जा सहजनं ।
 कळं वाली यातं सररर वनावो छकलनं ॥१४०॥

कयावो नुग्लेसं भुमिस अन गोळं तुल वना ।
 वनीनं प्राण् वोया घिटिघिटि च्वनं का अन च्वना ॥
 वळं ही बा ह्वायाना जुल अन अचेतं छकलनं ।
 फये वोया सीमा भुमिस ग्वलतूथें तुलवनं ॥१४१॥

वनं का राम् लक्ष्मण् रणभुमि स्वयावो सुमुकनं ।
 सतीकं तुं वोनं गन च्वन व वाली अन हनं ॥
 खनं का वालीनं रघुकुलमणी लक्ष्मण अनं ।
 अभीमान् यानावो वचन अन ह्वातं चिइसळं ॥१४२॥

छु याना राम् छीनं छि व जि व मत्वाना थन हनं ।
 छया आसं स्याना जित छिन सुलावो मफतनं ॥
 जि वो सुग्रिव् त्वाना छिन जित कयेका दियदु ला ।
 छि जा न्यायेकारी जगत हित याह्मं छि मखु ला ॥१४३॥

कनं तारानं जा छन्हु छिगु महीमा जित दना ।
 वया त्वानं जी जा धरम छिन तोती मखु खना ॥
 मसीया जि छीनं कपट थुगु याई धक मनं ।
 छिगू जि छू स्योका मखुगु छु छु यागू जिन खनं ॥१४४॥

जिमी दाजू कीजा हिनछि थन त्वाना सुमुकनं ।
 जितं छाये स्याना जिन छित छु याना अधमनं ॥
 कनकं का तारां सुमुक थन दोसं छिन धका ।
 जि हे अज्ञान् जूया सियत थन वोयाथ्य जुल का ॥१४५॥

छिनं सुग्रिव् त्वाये चिन थनस सीता तन धका ।
 जितं कंगू जूसा गनगन दु माला अनन का ॥
 हया बी रावण् जि खिपतन चिनावो लुतुलुया ।
 उली ज्या याकेतं कपट छिन याना दिल सुला ॥१४६॥

छको सी हे मानी जनम जुय धुपि सकल का ।
 अले वाली चोनं सुमुक अन हाले मफुत का ॥
 छनं यागू पापं जिन थन कने न्यों मन तया ।
 हरण् यातं छं जा कुल वधु किजाया बल दया ॥१४७॥

बिचा या छं थो ज्या मखुगु सन खै ला मखु धका ।
 महात्मा सुग्रिव् म्वा सित मखु वया स्त्री यन्यव का ॥
 कला यातं छं भौ उकिन जिन दण्डं थुगु बिया ।
 मळेंका जि पापी धरम दुम्ह लेंका जिन बिया ॥१४८॥

अले धाळं वालि जुल थन जि पापी सहजनं ।
 शरण् का छि जीगू स्वरग जित लाकादिसँ हनं ॥
 जिनं सीना वोने फुइगु खन अंगद् छम्ह जिनं ।
 प्रिये अंगद् याकी छिन थन धया सुग्रिव जिनं ॥१४९॥

जितं पीडा जूळं शरिरस थव घाळं अधिकनं ।
 धया जि योयो थें छित थन मसीसें छकळनं ॥
 रघूनाथ क्षेमा या छिन जित थनं जा खुशि जुया ।
 अती पीडा जूया वल म्हस दु घानं म्हतुम्हुया ॥१५०॥

मवोळं खं वैके सुमुक च्वन वाली थुलि धया ।
 खबर् सीळं तारां सित अनस वाली धकधया ॥
 वळं खोया ब्वांब्वां नुगल वन दाया ततचवतं ।
 खनं श्रीराम् लक्ष्मण् अनं च्वनगु सुग्रिव ववखतं ॥१५१॥

खनं गोटूलावो च्वनगु थव स्वामी अनस का ।
 विलाप् यातं खोया अधिक अन वोनं सित धका ॥
 अहो स्वामी छीनं थन भुमिस छाये दियगु का ।
 मच्चों मेपि जूजू भुमिस थुगु ताळं गनन का ॥१५२॥

जिगू प्रेम् तोता छि थनस छिन छाये दियगु का ।
 कला सुग्रिव्याम्हं यन छिन बळं जा उखुनु का ॥
 पितीना दीळं वो अति छिन वयातं दुख बिळं ।
 उकीया फळ् थो का जिन छित कना खं हित बिळं ॥१५३॥

विदेश् झाया दीळं वइ मखुगु थासं गन गनं ।
 लुया बाजू अंगद् छिन थनस वाना वन हनं ॥
 मखूथें यातं छि जिन छित छु याना मखुगु नं ।
 जिनं जा छोगू तूतिस थन थव दीका छचल तुनं ॥१५४॥

चवनं तारा शोकं अन भुमिस अथ्थे खवतुखवया ।
हनूमान् चोनं धिरज थन वेकी धक धया ॥
कने तारा जीनं छित थनस ज्ञानं भति हनं ।
गुली थो संसारे जनम जुल वोया थन चवनं ॥१५५॥

अमीसं यायेमा थव करम भोगं सकलनं ।
छिनं पुण्ये पाप्या खिपतन चिकावो चवन थनं ॥
छु याये शोक् छि सो करम फल वो थें सनि छिनं ।
दुखीयाके वं छि अति थन करुणा ह्यिनछि नं ॥१५६॥

छको सी हे मानी च्वनि मखु थ्व प्राणं थनस का ।
लखे पोजा वो थें थन थुगु शरीरं जुल स्व का ॥
मते शोक् याये छि धिरज थन वेकी छिन मने ।
लहीनाचों अंगद् थनस दनि वो जा उम्ह खने ॥१५७॥

क्रिया याता स्वामि स्वरग छिन लाकी थन हनं ।
चितासं योंकावो उकि थन व वाली जुजु हनं ॥
खनी अंगदनं जा जुजु तिलक कागू छिन थनं ।
हनूमान् धागू थुलि वचन नेना अन दनं ॥१५८॥

अले तारां धाळं पति मडु मिसा जा हिसि मडू ।
छु याये जी स्वानां जि तय मन योंसां दुख मडू ॥
हनं वाळीं धाळं सिइत थिक जूहं अन थुगू ।
किजा सुग्रिव् छं न्यों झिइ निह्म मल्वासें स्व मफुगू ॥१५९॥

विधातां चोयावो मतल थुगु कर्मं झिइत का ।
मिले जूया राजे जुयगु मडु का ह्तां जि व छ का ॥
छनं राजे या ह्तां जिन गमन याये यमपुरी ।
शरण् का अंगद् छं छनत बल बीफू गुलिगुली ॥१६०॥

बिये छंतं जीगू थुगु रतन माला थनि हनं ।
 थुली नेना सुग्रिव् दुख अनस ताळं अधिकनं ॥
 हनं अंगद् यातं बिल अरति ज्ञानं भति अनं ।
 मिखा वो म्हतूनं हितुमतुतु हीका स्वत वनं ॥१६१॥

भयानक् रूप् जूया हरुक अन प्राणं वन वया ।
 च्वनं का फोज् मूना कपित अन हुंहुं जक ख्वया ॥
 विलाप् यातं तारां अधिकन अन खोयाव ततसळं ।
 अहो स्वामी जीनं हित वचन ल्लाना छित बळं ॥१६२॥

ख्वया चोनं तारा भुमिस ग्वल तूला अन अर्थे ।
 विलाप् यागू सोया मन अति ख्वयावो वल अर्थे ॥
 वनं सुग्रिव् नं जा रघुकुलमणी जा गन च्वनं ।
 वना राम्या न्होने विनति अन यातं दुख मनं ॥१६३॥

मखूथे यातं जीं मभिन जिगु बुद्धी थन वळं ।
 जितं धा का दाजू छनत जिन स्याये मखु बळं ॥
 नहाके स्याना जीं जित थनस पापं कथन हनं ।
 मफू सोये जीनं हनननन खोळं फुक थनं ॥१६४॥

लही अंगद् तारां जिन थन सियेगू मन वळं ।
 सिना वोने मिसं जिन थन दुब्बानाव छकळं ॥
 सिता माला बीका कपित थन चोपिं फुकसिनं ।
 मदूसां जी जीळं सनि छिगु हुकूमं अमिसनं ॥१६५॥

सिना वंसां ज्यू का थव कुल फुकीह्यं छकलनं ।
 छिनं आज्ञा जूसा जिन थन सिये का सुमुकनं ॥
 थुली सुग्रिव्यागू बचन रघुनाथं थन हनं ।
 अती काथर् जूया थुगु वचन ल्लागू अन खनं ॥१६६॥

अले जा रामजूयां छववि बल मिखा धरधरं ।
अती शोक् यानावो स्वत अनस तारां रघुवरं ॥
घये पूना वाली च्वन अन व तारां ग्वल तुला ।
सिना वने भापा च्वनह्य अन चां चि बुतु बुला ॥१६७॥

थनं मंत्रीपिसं धिरज छिन या ह्नां थन धका ।
छखे योंके त्यंसां वनि वनि प्रियेया सतिक का ॥
खनावो रामजी जा पुलुक अन तारां दुगु हनं ।
वनं विन्ती यातं रघुवर छिनं स्या जित थनं ॥१६८॥

छु याये म्वानां का पति थन सिकावो जि जक का ।
छ्वया दीसं छिनं गन वन व स्वामी अनस का ॥
जितं माली वोनं स्वरगस वनावो अन हनं ।
कनं का श्रीरामं करम म्हुय फूला मफु वनं ॥१६९॥

मया विर्या नारीं अधिक तव शोकं गनन का ।
थुली नेना तारां धिरज अन यातं सुमुक का ॥
तरे याये काळं मफु थन सुनानं बलन का ।
अती बळ्बान् वो जा फुय मडु व काळं गनन का ॥१७०॥

सिना वोनं वाली स्वरग वन वो जा थनन का ।
मयासें शोकं छं सतिगति स्व याये वइत का ॥
रघूनाथजीनं थो वचन थुलि धागू थ्व खनका ।
बुझेयातं सुग्रिव् अनस व लछुमन् थुगु धका ॥१७१॥

सिथं योंकी सुग्रिव् छिमि फुक मुना वालि थननं ।
वचन् नेना रामया सिइथन व सुग्रिवजिन हनं ॥
तयावो पाल्कीसं यन अन व वाली उयत नं ।
वनं सीया न्ह्यो न्ह्यो सकल अन अंगद् सहितनं ॥१७२॥

वनं अंगद् सुग्रिव् कपित अन फौजं फुक खवया ।
 हनं तारा आदी लिउ लिउ मिसापि वन खवया ॥
 वनं नापं थोकं वन फुक खवयावो अनस का ।
 खुसी सीसं थ्योंका अन दिप दयेका बइत का ॥१७३॥

तळं मि अंगदनं उत अन व चंदन् सिँन हनं ।
 उये धुंका वाली म्वल ल्हुत खुसीसं अमिसनं ॥
 अले वालीयातं तरपण व ठंखं बिल अनं ।
 लिहां वोया सुग्रिव् रधुवरजि नाप्ला वल हनं ॥१७४॥

दथूसं राम् लक्ष्मण् चउ दिगस माक्ळं फुक उळं ।
 हनूमान् आदीसं सकल च्वन अंगद् अन जुळं ॥
 अळे विन्ती यातं रघुकुलमणीया चरणसं ।
 वने किष्किन्धासं झिइफुक मुनावो अन रसं ॥१७५॥

अचळ् राजे बीळं छिन अति कृपानं जिमित का ।
 पुजा याये छल्पोळ् जिमि फक्व बियावो रतन का ॥
 अले रामं धाळं पुरस जिन चोने मखु थुका ।
 प्रतिज्ञा दू जीगू वनस जुय वासं थन धका ॥१७६॥

अभीषेक् सुग्रिव्या छिमिसन तु याहुं अन वना ।
 थुली राम्या आज्ञा सिरसतु फयावो वन दना ॥
 वनं किष्किन्धा सो जुल जुजु व सुग्रिव् शुभ दिने ।
 कुयेका छत्रं नं चवर अन गाका च्वन न्हिनं ॥१७७॥

बिळं युवराज् अंगद् शुभदिन स्वयावो अमिसनं ।
 अले पर्जा लोकं जयजय धयावो जुल अनं ॥
 कनं राम्जीयातं लिसल जुजु सुग्रिव् जुवगुया ।
 महात्मा सुग्रिव्नं परम सुख भोग्या जुजु जुया ॥१७८॥

वनं सुग्रीव् ल्याहां रघुवरजियागू वचननं ।
पुरी किष्किन्धासं वन फुक मुना माकलत नं ॥
वनं राम् लक्ष्मण् प्रश्रवण् गिरिसं जा सुमुकनं ।
भयानक् वो थाये च्वन अनस जंतू फुक हनं ॥१७९॥

दु का भाळू सिंहं वनचरत मेपि अधिकनं ।
मनोहर् थाये का स्वयनप ययायू जुल अनं ॥
दयेकावो छें जा परवत च्वकासं भिनकळं ।
दिळं राम्जी लक्ष्मण् अति हरष जूया मनमनं ॥१८०॥

कनं लक्ष्मण्यातं रघुकुलमणिं जा अन हनं ।
फये वो पर्वोसं हिति दु थुगु थाये जिन खनं ॥
चतुर्मासं पेला झिइ थन च्वने का सुमुकनं ।
त्वहनं भिंभिगू स्वयनप ययायू थन खनं ॥१८१॥

बयान् यातं बन्या रघुकुलमणिं नं अधिकनं ।
खने दू किष्किन्धा झिइ थन च्वनावो सहजनं ॥
दिळं राम्जी लक्ष्मण् परवत च्वकासं अति सुखं ।
मफूतं लोमंके लुमन अन सीता जुल दुखं ॥१८२॥

म्बती मा चोबू थें धर धर मिखासं खवबि बुळं ।
खना राम्जी खोगू उगु घरिस लक्ष्मण् दुखि जुळं ॥
मते शोकं याये दुख सिइ स्व शोकं हनहनं ।
फुके मानी झीसं कुल सहित रावण् सहजनं ॥१८३॥

किजा लक्ष्मण् छं जा जित कन खँ भिगू स्व थनसं ।
जिनं तोता शोकं तय जिगु मनं थीर थनसं ॥
सुखं ती सुग्रीवं ऋतु गुलि दु वर्षा अन तकं ।
खुसिं बा वो आ जा फइ मखु वने नं स्व कतकं ॥१८४॥

ऋतू वर्षा जूया लखन पनि ठँय् जा सकभनं ।
 हथासं यायेगू मजिल थुगु काले स्व थननं ॥
 उकिं सुग्रिव्यातं सुमुक तय माळं थन हनं ।
 सिता माले माला कबुल जिन याये धक वनं ॥१८५॥

कला वाना सुग्रिव् चवनगु वन ताकाल दत का ।
 फुकी वर्षा वोनं जुयकि थन जा ज्या सकल का ॥
 थमंतुं वोयावो च्वनि व थन ईले सुमुकनं ।
 किजा लक्ष्मण् छं सो लख सुइ खुसीसं सकभनं ॥१८६॥

लना चोनं काळं वम थन मभीना ठँ लि हनं ।
 मखू सत्ये तोती विर धक धयाह्मं छकलनं ॥
 पुरा याई वोनं सुमुक थन वोया प्रण जुळं ।
 थुली आज्ञा नेना रघुकुलमणीया अन जुळं ॥१८७॥

छिनं धागू ज्या जा सनि थनस सुग्रिव्जिन हनं ।
 फुका वर्षा ऋतू शरद ऋतु वेवं सनि वनं ॥
 अले लक्ष्मण्जीनं विनति अन यातं मधुरनं ।
 अथे जूसा दाजू फुकि थनस वर्षा थुलि थनं ॥१८८॥

राजे याना चवन अन सुखं सुग्रिवं जा सुमूकं ।
 स्वर्गे इन्द्रं गुगु तरहनं राज्य यातं व थिक्कं ॥
 वोथें सुग्रिव् अनस खन का बुद्धिमान् माहवीरं ।
 राजा सुग्रिव् थनस छित जा याय माळं उगुं ज्या ॥१८९॥

धीला याये छिन थन मते छीन याय्मा उगू ज्या ।
 धीला याये छिन थन मते काल फीवं मजू ज्या ॥
 आसे धाये पर हित छिनं गोलसं जा मते का ।
 झतपत् याना रघुकुलमणीया व सीता हये का ॥१९०॥

माळें फूका थन वन धका जानकी वोन थातं ।
वश्ये जुया वन छिगु धका ठंचवनं का थव काळं ॥
व्हापां छीतं पर हित धका हीत यानाव काळं ।
जूजू छीनं ततपर जुयावो सिता माल्य माळं ॥१९१॥

आज्ञा ब्यूसा जिन थन वने देश देशं हिलावो ।
कोटी कोटी छिह्मा दु परजा चोंगु दू बिर् जुयावो ॥
माहावीरं थुलि अन धया बिनित यागू न्यनावो ।
सुग्रिवजीनं अति खुशि जुया धागु भिका धयावो ॥१९२॥

जम्मा यातं लसकर वनं कोटि कोटी उथासं ।
मालिक् माक्ळं मुनकल फुकं मुंवये मा हथासं ॥
वा धा बेले मवइ गुह्य का प्राण काये वया का ।
उर्दी बीळं थुगु तरहया सुग्रिवं जा धया का ॥१९३॥

थूखे सुग्रिव् अति हरषनं छेँस सुम्कं वनं का ।
ऊखे बर्खा मजुल न्हिनछी रामया शोक् वळं का ॥
बोगू सोळं शरद ऋतु नं जानको ठूमना का ।
सुग्रिव् कामं स्वह अति जुया चोन धीलां धका का ॥१९४॥

आज्ञा जूया थुलि रघुवरं मोह जूया च्वनं का ।
ध्यानं खंका च्वन अन व नं जानकीया गुणं जा ॥
स्वां मावोह्मं बनन वल का लक्ष्मिवान् लक्ष्मणं का ।
रामं शोक् या अनस खनका दाजु धाळं वनं का ॥१९५॥

तोता शोकं धिरज मननं योग या का थुथासं ।
योगं छीनं जुयकि थन का ज्या-जि फुक्कं हथासं ॥
सीता स्वामी छलप्वल धका मेव स्वामी जु खै ला ।
माया मिनं गनस तल का न्ह्योन्य लाह्मं मनै ला ॥१९६॥

आज्ञा जूळं रघुकुल मणि तत्त्व ज्ञानं नितीया ।
 नीनी वस्तू कन थुगु धका धर्मया खं व बीया ॥
 लक्ष्मण आ का सकल जुजुपि त्वावनीगू थव काले ।
 सुग्रिव वोगू थनन मखनं गम्न घाना थव काळं ॥१९७॥

लक्ष्मण छं सो थुगुलि समये हंस आदी खुसीसं ।
 प्राणप्यारी छिन थन मखं जानकी का थव ईसं ॥
 सो सो लक्ष्मण जित हित मया सुग्रिवं जा वया का ।
 हेला यातं मनन अधिकं शर्ण वोना जुया का ॥१९८॥

सीता माले भर वन कया सो मवोनी दुरात्मा ।
 कीजा लक्ष्मण जिगु वचनसं माहुँ सुग्रिव दुरात्मा ॥
 किष्किन्धासं चवन वन सुखं काम वश्ये जुयावो ।
 सुनां याई थवत उपकार याय छीतं धयावो ॥१९९॥

आशा केना तइह्य गुह्य का पापि धाये वयातं ।
 भिगू जूसां मभिन जुलसां यायमा का वयातं ॥
 धासा वो जा अधम मखु का भिह्य धाये वहे का ।
 ज्या-जी याका थवगु सकतां बैत दाई अर्थे का ॥२००॥

वोया ज्यासं दनि मखु वना पापि धाये वहे का ।
 सीता वंसां नइ मखु सुनां ला वयागू छकू का ॥
 जीगू वाण् छं स्वय मन दया वे मवे थें चवना ला ।
 लक्ष्मण न्योंकी थुगु वचन छं क्रोधयागू खँ ह्लाना ॥२०१॥

याये मागू थन छन वया याकनं या वयावो ।
 फूके जीनं छिगु दुख धका सत्ययागू दयावो ॥
 पूरा यावा थनस छ वया लोलमंके दर्ई ला ।
 जीगू वाणं कयव छनतं वालि सीथें सिई ला ॥२०२॥

क्रोधं यागू रघुकुल मणिं लक्ष्मणं जा सिळं का ।
लक्ष्मणजीयां अति रिस बळं वो खनावो अनं का ॥
माक्ळं याई भर छिन कथा त्वाय चिंगू नहाके ।
सीला वोनं पर हित धका बुद्धि देला वयाके ॥२०३॥

खं का वोनं यमपुर वना वालियातं व सिस्ये ।
राजे वैतं बिय महु बिळं झीसनं जा मसिस्ये ॥
दाजू जीके रिस बल अती चीमफू रीसयातं ।
स्याना सुग्रिव् जुजु बिये जिनं वालिया काययातं ॥२०४॥

माली सीता कपि दल वना देश देशं वया का ।
लक्ष्मण्यागू थन रिस खना रामचन्द्रं थव धा का ॥
रिस् जा याये भिन मखु किजा त्वाय फूके महु का ।
न्हंका थंके मजिल थुगुया पाप छुं नं मफू का ॥२०५॥

लक्ष्मण छं जा थुगु तरह या पाप याये मते का ।
सुग्रिव्यातं मधुर वचनं धाहुं छं जा थथे का ॥
बोली भिका छन अति रसं वोन बेला धका का ।
सुग्रिव्यातं थुइक कं वना हीत जूगू खं ल्लाना ॥२०६॥

आज्ञा नेना रघुकुल मणीया व लक्ष्मणजिनं जा ।
किष्किन्धाया गमन अनसं यात का हर्खनं जा ॥
वो वीर् लक्ष्मण रिसन वन का छेंस सुग्रिव्जियागू ।
यमराज् वो थें चवन अन अमी वीर लक्ष्मण्जि झागू ॥२०७॥

माक्ळं सीका बिसि वन फुकं डूर डूरं जुयावो ।
मालिक् माक्ळं खबर बिल का जूजुयातं वनावो ॥
कामी सुग्रिव् स्वह अन जुया नाप तारा चवनावो ।
माक्ळं धागू वचन वन जा तांमता थें चवनावो ॥२०८॥

सुम्कं चोंगू जुजु अन खना मंत्रिपिसं हथासं ।
 आज्ञा बीया कपि दल व्छतं देश दक्कोगु थासं ॥
 लक्ष्मण्यातं पन न्हिपननं तीन स्वाकाव थीकं ।
 माहावीर्पि कपित वल का ल्वाय भापा अमीसं ॥२०९॥

लक्ष्मण्जीयां तमन अनसं माल सुग्रिव् जुळं का ।
 अंगदजीनं खन व अधिकं रीस या लक्ष्मणं का ॥
 शोकं आतुर् जुल अधिकनं ग्यात का वो अनं जा ।
 अंगद्यातं सतिक सलता धाल कंहुं धकं जा ॥२१०॥

सुग्रिव्यातं जि वल थन धा विन्ति याना छनं का ।
 कीजा लक्ष्मण् रघुकुल मणीया वया च्वंगु कं का ॥
 नाप्ला वा धा जित वन छको ल्यांह वा छं थनं का ।
 अंगदन् जा खबर कनका चोंगु सुग्रिव् अनं का ॥२११॥

न्योंका बीळं अन फुक खँ नं न्ह्योल वो का वया जा ।
 क्रोधं लक्ष्मण् च्वनगु खनका माकळं हा वया जा ॥
 माहा शब्दं किल किल धका हाल का वज्र जूथें ।
 हागू शब्दं दन अन जुजू न्हेल गाकाव अथ्थें ॥२१२॥

अंगदजीया म्हुतुन कनगू नेन सुग्रिव् च्वना का ।
 मंत्री निह्णं अनस वन्न का ह्हाय वार्ता धका का ॥
 जूजू छीतं जुजु बिल मुनां वैह्य कीजान रीसं ।
 वोया वं जा थन धनु ज्वना चोंन झीगू पुरीसं ॥२१३॥

अंगद्यातं वन हल धया वो वळं का हथासं ।
 माहाराज् आ झटपट वना कोप तंकी थुथासं ॥
 श्रीराम्चन्द्रं गुगु तरहनं स्यात वाली व हे थें ।
 माला ब्यूका छिन हतपतं जानकीजी अथे थें ॥२१४॥

मंत्रीं धागू थुलि अन खना धाल सुग्रिवजिनं का ।
 आशा केना थन जिन तथा याय त्वाये जिनं का ॥
 फू जिं फुक्कं रघुकुल मणीया व ज्या पार याये ।
 याये जीनं मफुनि थनसं छुं छगू नं छु याये ॥२१५॥

धागू नेना थुलि वचन वोनं व सुग्रीव् उथासं ।
 वायू पुत्रं अन मधुरनं धाल जूजू दु थासं ॥
 श्रीरामचन्द्रं भय छिगु फुका बील वाली फुका का ।
 प्रेमं यागू रघुकुल मणीं कोप छीतं थ्वया का ॥२१६॥

बर्खा फूसा शरद वल का माल्य सीता जिळं का ।
 राजा जूया छिन च्वनि अर्थे मोह जूया थनं का ॥
 लक्ष्मण् वोगू खबर बियतं कोप याना थनं का ।
 हक्का धागू सह छिन थनं यायमा लक्ष्मणं का ॥२१७॥

अप्राध् छीगू थनस खनका लक्ष्मणं यागु रीसं ।
 सुम्कं चोंसा भिन जुइ थनं भि मवो जी मतीसं ॥
 याहुं याक्नं कुल सहितनं वो अनी छि वना का ।
 आसे धाये छिन थन मते मोह जूया च्वना का ॥२१८॥

वायू पुत्रं थुगु तरहनं अति बीया छ्वतं का ।
 भेतघात् यातं लसकर मुना सुग्रिवं जा अनं का ॥
 सुग्रिव् आदी वन फुक मुना विन्ति याना च्वनं का ।
 कोधं चोंगू खन अमिसनं लक्ष्मणं जा मनं का ॥२१९॥

तोता छीतं मपन अमिसं त्रास नं जा लज्जेसं ।
 लक्ष्मणजीनं खन अन दुने बानलागू व देशं ॥
 देश्या शोभा फइअखु कनां सोयनं खुब् ययापू ।
 चत्तचित् चोंका छ्यन अमि सँ का चोन्य नं जा न्ह्यापू ॥२२०॥

वस्तं तीसां भिनभिन तिया बानलाका लज्जोसं ।
 वोया चोपि खन अनस का माकळं वो पुरेसं ॥
 ठंखं निर्मळ् अनस दु खनी पर्वतं न्ह्यागु नं का ।
 अंगद्या छे खन भति वना बानलागू अनं का ॥२२१॥

हानं लक्ष्मण्जिन अन खनं छे व सुग्रिवजियागू ।
 पाले चोनं चुपि अन लुया द्वारसं जा वयागू ॥
 छे जा लुंया अति हिसि दुगू बानलागू खनं का ।
 लक्ष्मण् झाळं अनस सुमुकं वैत माकळं मयं का ॥२२२॥

ह्लेगू लूखां सुरुसुर वना थेनकावो वदथासं ।
 लासा लाया तल अन अहो बानलागू उथासं ॥
 सुग्रिवजीया अति हिसि दुपि दु व च्यो भ्वातिनं का ।
 अन्सं चोना खबर बिल का वाणनं लक्ष्मणं का ॥२२३॥

ताळं टंकार् अन धनुष्या सील का सुग्रिवं जा ।
 लक्ष्मण् वोगू थनस दु धका त्रास चाया व नं जा ॥
 तारा नाप्ला छन भति वना रामजूया किजा का ।
 क्षेमा याई वन छनत जा जि अवस्ये खना का ॥२२४॥

छं नं हेका तय यँ अनली जीं वयावो स्वये का ।
 वोनं तारा अन अति खुशीं सुग्रिवं धाव येका ॥
 लक्ष्मण्जीया सतिक वन का हेवय जीनं धका का ।
 हे राज्कूमार् छिन थन अधिक् छाया कोपं दिया का ॥२२५॥

तारां धागू मधुर वचनं नेन का लक्ष्मणं जा ।
 स्वामी छंहं धरम तनका वोय मागू जिनं जा ॥
 त्वायेया ज्या परहित निता तोतुसा धर्म फूई ।
 तारां धाळं बखत दनि का त्वायेया ज्या व जूई ॥२२६॥

जोगे छीनं मजुल थनसं कोप याये थुथासं ।
 त्वायेजूनं मखुगु सनसां याय क्षेमा हथासं ॥
 कामाशक्तं च्वन थनस का काल वंका व दीनं ।
 कामं मोहं सु जक मजुई धाय माला थ्व जीनं ॥२२७॥

छोगू दू का खबर थननं सुग्रिवं जा लुमंका ।
 कोटी कोटी कपित मुनका वोयमा ह्हां थनं का ॥
 पर्जार्पितं छ्वत वन धया जानकी माल्य यातं ।
 न्योका तारां थुलि मधुरनं येन बोना वयातं ॥२२८॥

लक्ष्मणजीनं खन अन वना सींह आसन् लुंयागू ।
 चोनं सुग्रिव् उकिस मगनं बानलाका ह्मयागू ॥
 तीसा वस्तं भिनभिन तिया इन्द्र राजा च्वनीथे ।
 सुग्रिव् चोंगू अनस खन का लक्ष्मणं जा अमी छे ॥२२९॥

लक्ष्मण् ज्ञाया दन हतपतं सुग्रिवं जा उथासं ।
 रुमा आदी अन च्वक मिसातं दनं का हथासं ॥
 विन्ती याना अन सकसिनं न्ह्योन्य वोना च्वनं का ।
 सुग्रिव्यातं कन अन च्वना लक्ष्मणं ज्ञाननं का ॥२३०॥

राजा जूया धरम महुहां मित्रया ज्या मयाहां ।
 बोथे पापी दइ मखु गनं वैत धाये अधम्हां ॥
 रामं यागू छन उपकार् लोलमंका छ्जयेवं ।
 वाली स्वे दै यमपुर वना चेत याकाव वेवं ॥२३१॥

लक्ष्मणजीनं थुलि अन कना त्रास चाया अनंली ।
 तारां धाळं मधुर वचनं क्रोध तोती थनंली ॥
 लक्ष्मण् न्यों छि थुलि रघुवरं हीत यादू धका का ।
 सुग्रिव्जीया मनस दनि का लोममंनी वया का ॥२३२॥

लक्ष्मण् छीनं छु याना रिस जक पिकया छुं बिचा हे मयासैं ।
 रूमा अंगद् थव राज्ये धन जन सकतां वान छोया अवश्यैं ॥
 सुग्रिवजीनं व राम्या रिपु गनत फुकाहै सिताजी सुमुक्कं ।
 दूकाळं का पुरीसं छगुलि अरब वो ग्वीद्वळं दू असुर् नं ॥२३३॥

लक्ष्मण् छीं का बिचा या भतिभति कतकं स्यायफैला वयातं ।
 याये निम्ति सहाये रघुकुल मणिया सुग्रिवं जा थवयातं ॥
 बाँछि न्ह्यो हे जिथासं सकल थन वया मुं वयेमा धकावो ।
 मीचे याना मवोसा यमपुर खनके बैत जिं ह्तां धयावो ॥२३४॥

उदौ बीया थुजोगू छ्वत दश दिगसं दूत यातं हथासं ।
 तोती छीनं थव कोषं वइ थनि कल्लसं कोटि कोटी हथासं ॥
 माकः भाळूत दै का लसकरत मुना जि गुलीतं कने का ।
 ताराया खं न्यनावो तनकल मनसं लक्ष्मणं कोष नं का ॥२३५॥

धाळं सुग्रिवजिनं जा अन अति मधुरं हर्ष जूया उथासं ।
 त्वायेजूया प्रशादं जित थन दत का राज्यसं याय बासं ॥
 पक्षे जीगू वयातं निमित्ति जक धका स्यायफू रावणं वं ।
 साळ्या बृक्षे छकोळं कयकल वन जा तोथुळं ह्तेगु मा वं ॥२३६॥

मेपिं खेले मद्दू का वइगु बलस जा बळ् वया सोय धूनं ।
 ल्वा जा बोनी व राम्जी लिउ लिउ जि वने दास वोया जि जूळं ॥
 सुग्रिवजीया खँ नेना खुशि जुळ अन जा लक्ष्मणं प्रेम यातं ।
 नू नू सुग्रिव् जि लीसे छन मन थिर या याकनं दाजुयातं ॥२३७॥

शोकं व्याकुळ् जुयावो रघुकुल मणिनं तंभवया धागुसा नं ।
 क्षेमा याना दियेमा जिन थन तमनं न्ह्यागु धासां अज्ञानं ॥
 थूली नेनाव सुग्रिवजिन अति हरषं वायुया काययातं ।
 हूकुम् यातं उथासं परवत पतिकं छो छनं दूतयातं ॥२३८॥

कैलाश् आदी गिरीसं लुइ बिइ तकया माकळं वा धकावो ।
थप् थप् याना व्छया ब्यू थनि झिन्हु दुखुनू मूंवयेमा धयावो ॥
जीगू आज्ञा मनैसैं मवइ गुह्य थनं प्राण काये वयातं ।
सू सू जीगू हुकुमसं च्वनि उह्य थनसं वोयमा धा स्व झत्तं ॥२३९॥

माकळं धाके व्छयाब्यू झतपत थन छं वेगनं ब्वान छोया ।
हूकूम सुग्रिव्जियागू थुलि अनस कया चोन वं दूत छोया ॥
वायू पुत्रं व्छयावो वन फय वन थें दूत माकःत नं का ।
हूकुम् नेना व ठंका लुइबिइ तकया माकळं फौज मुंका ॥२४०॥

श्री रामजूया सतीकं बल अति दुदुपि कोटि वोगू मुना का ।
माकः भाळू वळं का जगत भर दको तीनतीनं न्हूया का ॥
सुग्रिव्जीया हूकूमं फुक वल अनसं त्याखनं का अल्याख् का ।
बीया सुग्रिव्जियातं फलफुल छु छु दू नाप लातं वया का ॥२४१॥

हूकुम् सीरे फयावो जुजु छिगु जिमिसं ब्वान वोया हथासं ।
धागू नेनाव सुग्रिव् खुशि जुल अनसं काल फळफुळ् उथासं ॥
लक्ष्मण्जीनं अनंली मन अति खुशिनं धाल सुग्रिव्जियातं ।
किष्किन्धानं वनेनू झिइ फुक अनसं धागु नेनाव झत्तं ॥२४२॥

लक्ष्मण्जीया खँ नेना मन अति हरषं सुग्रिवं जा द धाळं ।
वा वा पर्जा धकावो अति ततसलनं फुक्क नैकाव हाळं ॥
वोळं फुक्कं तुरन्तं हूकुम छु छु धका विन्ति याना च्वनं का ।
धाळं सुग्रिव्जिनं जा हकि थन छिमिसं पालकी जीगु ज्वंका ॥२४३॥

हूकुम् नेना तुरन्तं हल अन अमिसं पालकी न्ह्योन्य थेंकं ।
लक्ष्मण् सुग्रिव् निह्येस्यां मन अति हरषं चोन पाल्की दुनेसं ॥
छत्रं क्वीकाव सुग्रिव् चवर जवखवं संख भेरी पुयेका ।
नांगा तर्वार् लुयेका अमिसन उयका केन राम्जी लुयेका ॥२४४॥

राम्या न्होने वनावो अति मन खुशिन भोकपूळं तुत्तीसं ।
 हाकनं लाहात जोपा रघुकुल मणिनं विन्ति यातं उकीसं ॥
 रामं सुग्रिवजियातं थन अन दँ धका मान यानाव हानं ।
 दीसं त्वाये धयावो तल रघुवरनं चोन सुग्रीव हानं ॥२४५॥

श्रीरामचन्द्रं मधूरं मन अति खुशिनं धाल सुग्रिवजियातं ।
 न्याये चोंसा सदानं शुभ जुइ जुजुया धर्म तोतां वयातं ॥
 भि जा जूई मखू न्हां धरम मदुह्या फूइ वो जा अवश्ये ।
 त्वाये सीताजि माले बखत जुल छिनं या स्व उद्योग् अवश्ये ॥२४६॥

सल्हा मंत्रीपिनीके छिन थन दयकी धागु रामं खनावो ।
 राम्या न्होनेस धाळं जित छिन बिल का राज्य पदबी कयावो ॥
 सीता माले धकावो रघुकुल मणि जीं फौज बोना हया का ।
 लाखं कोटीत माकः अति बल दुदुपि चोंगु दू न्हां वया का ॥२४७॥

कोब्बीं वो थें वई का अति सुर मननं धागु याये धका का ।
 सीता मालेत वंसां असुर फुक फुका है सिता नं ब्वना का ॥
 त्वाये सुग्रिवजिनं जा मन अधिक तया यागु उद्योग् खना का ।
 धाळं खूशी जुयावो रघुकुल मणिनं ज्या जुई न्हां धकाका ॥२४८॥

हाला चोंचों थथे तुं दश दिग खिउँळं धू ब्वयावो अधीकं ।
 तो जा पूया वळं का भुमि फुक सनका चौदिगं स्वे मजीकं ॥
 माकः भाळू वळं का इलिलिलि भिनकं तोपुइकं भुमीसं ।
 नं न्याईथें व हाला लुइ बिइ तकया वोल माकः व ईसं ॥२४९॥

राजा सुग्रिवजियातं अन वक कपिनं कोछुना या अनी नं ।
 सुग्रिवजीनं वनावो खबर कन अनं रामयातं भती नं ॥
 त्वाये रामजी स्व छीनं थन अति सुरनं वोल सेना जोनाव ।
 जीगू राज्येस चोंपि कपिगण सकळं चोन छू ज्या धयावो ॥२५०॥

सुग्रिवजीनं व धागू न्यन रघुवरनं नाप लातं वयातं ।
 आज्ञा जूळं व रामं छिन थन सियकी जानकीयागु थातं ॥
 लक्ष्मणजीनं थव याये मफु छिन फइ का जीन सीका कया का ।
 याक्नं आज्ञा बिया छो गन गन छवयगू चौदिगेसं धया का ॥२५१॥

थूली नेनाव सुग्रिव अति मन हरषं राम लक्ष्मण दु थासं ।
 हूकूम यातं तुरन्तं अन व गुलि व दू फौज फुक्कं दुथासं ॥
 माहुं पुर्वे स्वया का गन गन दु धकावो सिता देवियातं ।
 पर्वत् पर्वत् पतीकं गन तल सुचुका रावणं जा वयातं ॥२५२॥

रावण्या थास वोना लछि तक त चवना ल्यांह वेमा स्व झत्तं ।
 लच्छी प्वीका सु चोनी जिन उह्य कपिया प्राण काये तुरन्तं ॥
 थातं सीताजियागू थन अन दु धका याक्नं वा लुयेका ।
 हूकूम नेना तुरन्तं कपि गण वन का जानकी सावने का ॥२५३॥

सुग्रिवजीनं अनंली अति चतुर स्वया यात हूकुम् उथासं ।
 जाम्बवान् श्रीहनूमान् निह्य अति बलवान् छोट दक्षीण दिशासं ॥
 सीता माला सुनां वै लछि दु छुनु वना जीं सिता खं धकावो ।
 याये बैतं अती प्रेम् जनम भर जिनं धाय बंधू धकावो ॥२५४॥

थूली न्योंका अनंली हूकुम जुल हनं जूजु सुग्रीवनं जा ।
 ताराया बौह्यायातं विनति जिगु धका हाजपा ह्लातनं जा ॥
 धाळं सुग्रीव बीरं अमित अन हनं माहुं सीता धका का ।
 हीतू हीलाव माहुं गन दइ व धका जानकीयात का का ॥२५५॥

अस्ताचळ थ्योंक वोना लछि दु छुनु थनं ल्यांह वा ह्लां वनावो ।
 लच्छी प्वीका सु चोनी सिइ जुल उह्य जा स्वाय गाई वयावो ॥
 माहावीरं सुषेण जा श्वसुर जिह्य जुळं हुं छिपीं नं वनापं ।
 हूकूम नेना जुजूया वन अन कपितं पश्चिमे चूपचापं ॥२५६॥

हावनं सुग्रिवजिनं जा सलतल व स्वया यात हूकूम उथासं ।
 बोना योंकी थनं का छन सुसु जक यो फौज मुंका थुथासं ॥
 उत्तर दीशा वना हुं रघुकुल मणिया प्यारि सीताजि माला ।
 वोनां वोनेफु थातं छिमिसन स्व वना वोयमा ह्मां व माला ॥२५७॥

आजा बीळं बिदाया सकल दिगसनं सुग्रिवं जा लुमंका ।
 ज्या जा याई हनूमान्जिन जक खन का प्रेम याना मनं का ॥
 स्यूका छं जा स्वंगू लोक चतुर अति छ जा जीन सीका कया का ।
 सीताजीयागु थातं छकलन दइगू यत्न या ह्मां वना का ॥२५८॥

श्रीरामजूयां मनेसं वन पवन सुतं सिद्ध याईगु जा ज्या ।
 बीळं चीं जा व अंगू छन अन सुमुकं ब्यू हनूमान् धका का ॥
 सीतायातं थव अंगू छन अन सुमुकं ब्यू हनूमान् धका का ।
 सीकी सीतां खनेवं छनत थुहा धका धिर्ज वोई वया का ॥२५९॥

रामं बीवं कयावो अन पवन सुतं हाजपा त्हात जूळं ।
 योंका अंगू व छेले रघुकुल मणिया पादुका भोक पूळं ॥
 प्रस्थान् याये तयारं चवन मन खुशिनं फौज नापं बवना का ।
 छं हे मा सा लुईका थन अन दु धका जानकी जिं खना का ॥२६०॥

सुग्रिवजीनं अनंली कपि गणत स्वया धाल का वो लुमंका ।
 जीगू हूकुम् मिथें चीं छिमिसन सियका हुं सिता मा थनं का ॥
 कोब्बीं वोंथें वनावो प्रिथिवि भर फुकं तोपुया गम्न यातं ।
 चोना दीळं सुमूकं प्रसवन गिरिसं राम लक्ष्मण्जि थासं ॥२६१॥

सीताजीया समाचार दइ लछि दयवं निश्चये नं धका का ।
 उत्तर सोया अनंली सतल व सहितं वोन फौज मुता का ॥
 वोनं पूर्वे स्वया का बिनत वापि पती फौज नापं बवना का ।
 अंगद् आदी हनूमान् वन दक्षिण स्वया मन्मनं हर्ष याना ॥२६२॥

हावनं वोनं सुषेनं थव जनत ज्वना पश्चिमेसं स्वया का ।
छोया पेगू दिशासं मन मन हरषं सुग्रिवं दी चवना का ॥
गूगू दीशा वनेगू वन फय वन थें फौज माकः मुना का ।
ब्वांब्वां वोनं छकोळं शबद अति बिया ह्लाजपा विन्ति याना ॥२६३॥

ब्वांब्वां वोनं थथेतू जिन हय थनसं जानकीया खबर का ।
गूली छीनं व रावण् यमपुरस छवया जी हये वो सिता का ॥
याना हाँकं अनेकं थव मन वल थें वोन फौजं प्यखें का ।
सुग्रिव् जूळं खुशी का मन मन अधिकं रामया ज्या जुसैं का ॥२६४॥

नेनं सुग्रिव्जियाके रघुकुल मणिनं हर्ष याना उथासं ।
धन्ये त्वाये छि जा ह्लां गन तक छि वना स्वे धुनं देश थासं ॥
त्वाये राम्जी छिनं न्यों गुखुनु वल थनं दुंदुभी हाँक याना ।
दाजू वाली व जी वो असुर गन वनं स्यावना हाँक याना ॥२६५॥

ब्वांब्वां वोना व राक्षेस् परवत छगुली द्वांह वोनं गुफासं ।
वाली द्वाहां वनं का जि छहा जक हनं दच्छि चोना उथासं ॥
न्ह्याना वोळं गुफा नं खुसि वडगु गथे थोक्क वोथें गुफा नं ।
वाली सीगू खनावो जिन अन सुमुकं ळोंह तगगो हया नं ॥२६६॥

प्वाळं तीना गुफाया थव पुरस वया सूमुकं जा चवना का ।
राजे बीळं जीतं का अति कर बलनं मंत्रिपिसं मुना का ॥
राजे याना जिनं का अति मन विखुशं बोल बाली हनं का ।
राजे याना जि चोंगू खन वन तमनं स्याय भापा जितं का ॥२६७॥

लीना जूळं व बाली गन गन जि वनं ब्वान वोना उथासं ।
चौदीग् हीला जिनं जा सिय मन मदया प्राण ळेंकेगु आसं ॥
ऋष्ये मूके व बाली वड मखु व धका दायु पुत्रं कना का ।
वोना चोनं अनं जि अति मन थिरनं वालि ये जन् मया का ॥२६८॥

त्वाये जीनं उकीं स्यू दशदिगस फुकं जी वनें धुंहा जूया ।
 सीता माला जुयावो बन नगर स्वया हीतु हीलाव जूया ॥
 मालां लूई मखंका सुमुक वल लिहां पुर्व पश्चिम् उतर्या ।
 फौजं नापं वयावो मफुत जुजु धका धावलं न्ह्योन्य वोया ॥२६९॥

श्रीराम् लक्ष्मणजियातं प्रसबन गिरिसं सुग्रिवं विन्ति यातं ।
 माला हे का सिताजी जिन खन मननं माहवीरं स्व झत्तं ॥
 वोनं सीताजि योंगू उगु दिगस स्वया फौज जोना वनं का ।
 ह्लाना चोनं थये खं स्वहा अनस मुना हर्षनं सुग्रिवं का ॥२७०॥

अन उखे हनुमान्पिनि माजुळं ।
 फुक मुनाव हिला अमि सो जुळं ॥
 खन अनं बरुणाणय सागरं ।
 थकित नं जुल का अन बानरं ॥२७१॥

नियम झी फुत का थनसं धका ।
 सकलया मन जा खवल सी धका ॥
 अन व अंगद आदि कपी फुकं ।
 सुमुकनं चवन का मफया फुकं ॥२७२॥

विन्ध्याचळ पर्वतेसं फुक अनस मुना चोन अंगद सहीतं ।
 सक्स्यां धन्दा कयावो अति मन विखुशं मन्मनं फुक्क सीतं ॥
 वोळं आ जा वसन्तं अवधि फुक फुतं सुग्रिवं धागु नं जा ।
 आदर् यानाव धाळं अन अति मधुरं हाकनं अंगदं जा ॥२७३॥

सीता ल्वोका मवंसा यमपुर खनि का झीसनं जा अवश्यें ।
 सागर् तीरे चवनावो सिय थनस फुकं ल्याहूँ छेँसं मवंसे ॥
 किष्किन्धासं थ्यनेवं जिगु मनन खना स्याइ सुग्रिव् मभीनं ।
 बोना वोया स्व आ जा धन जन सकळें सी भिनं म्वा मभीनं ॥२७४॥

युवराज् जूया जि नं जा छिमिसन खनि का म्वाइगू ह्वां जि ज्यू का ।
 श्रीराम्चन्द्रं श्व पट्टी जित बिल सियकी सुग्रिवं जा मखू का ॥
 ह्वापां नीसें व वैरी जिन अनस वना ज्या मजूगू खनेवं ।
 तच्चो दण्डं बियावो जित अन अवसें प्राण काई खनेवं ॥२७५॥

थनस झी फुक सी जिल का बरू ।
 अन वनां दुख सी सुख सीमरू ॥
 थुगु कथं कन का अन अंगदं ।
 भय कया कपिनं छह्य नं मदं ॥२७६॥

अन हनं हनुमानन थो कनं ।
 जिन वने मजिळं...^७...सुम्कनं ॥
 थनस जानकि जा गन नं मळू ।
 मफु जि सुग्रिवयात कने मळू ॥२७७॥

झन हनं भय का कपि फौजनं ।
 थुगु गुफास च्वने फुक झी हनं ॥
 नयत फळ् थनसं सतिकं दु का ।
 नयगु नं छु खुनुं थनसं दु का ॥२७८॥

थुलि व अंगदनं अनसं च्वना ।
 फुक व बानरयात कनं दना ।
 कपिदळं खँ स्वया अति कोमळं ।
 स्व युवराज जिपि मफु सी बळं ॥२७९॥

थन मळू व सिता गन नं हनं ।
 गुगु कथं सुख सी थन झीसनं ॥
 अन गुफास दुने थुलि धा न्यना ।
 च्वन अनं हनुमानन जां कना ॥२८०॥

थन गुफास हनं जनमं धका ।
 मनस छि तल का सुख सी धका ॥
 तमन लक्ष्मणनं कयकेतु नं ।
 थुगु गुफा छकळं फुइगू जुळं ॥२८१॥

थनस छि च्वनसा फुक बानरं ।
 जुइ रिपू...लक्ष्मणजी हनं ॥
 फुकि वनं छनतं घडिछि थनं ।
 ...९... ॥२८२॥

मरु धकाव वने बरु झी फुकं ।
 थनस जू खँ कने गुलि दू मुकं ॥
 सुमुकनं च्वनि का जुजु सुग्रिवं ।
 छनत दैव कृपा मफुकी रिसं ॥२८३॥

सु दु अमी जक सो छिन बांलकं ।
 छि छह्ण काय दु का अमि जा फुकं ॥
 छिगु मती छु छु दू मसिया जिनं ।
 थुगु गुफास सुलां भिनिला छिनं ॥२८४॥

थुली धागू न्येना पवन सुतजीया खँ भिनगू ।
 अले अंगद्जीनं कन अन व सुग्रिव् मभिनगू ॥
 जिनं खंकं खंकं थवगुह्ण तताजू थिल वनं ।
 थवो दाजू स्यातं छल कपट यानाव थमनं ॥२८५॥

वनेनं जी ह्यां का थनस जिन चोने दुख सिया ।
 हनूमान् आदी नं सुमुक थव छें हुं सुख सिया ॥
 अवस्ये सुग्रीवं यमपुरस छोई जित अनं ।
 वया ह्लाति सीये भिन तिरथ सोया सिय हनं ॥२८६॥

थनंतुं जी सीका अन जक जि म्वाये दइ मखं ।
हनुमान् जाम्बूवान् सकल कपि फौजं हूँ सुखनं ॥
रघूनाथ लक्ष्मण्या कुशल जिन नेना हल धका ।
धया ब्यू वोनावो जिगु थुलि बुखं ह्ला लुमनका ॥२८७॥

थथे धाधां अंगद् अति बिरह याना खल हनं ।
बयें कुस् लायावो सिय थन धकावो चवन अनं ॥
थुली यागू सोया सकल कपि फौजं खल हनं ।
हिती हाथें खोबी धर धरन हाळं छकलनं ॥२८८॥

थुली अंगद्जीया दुख वचन नेना सकलनं ।
जिपिं नं सी आ जा धक फुक मुनावो चवन अनं ॥
सिये इच्छा याना सकल कपि फौजं मनमनं ।
चवना चोंगू काले भय वल अमीतं अन हनं ॥२८९॥

वहे पर्वतसं तुं वल अन गुफा नं सुमुकनं ।
ववलाहळ् नेनावो सु वल धक सोया अन वनं ॥
जटायूया दाजू वल अन व संपातिन हनं ।
खनेवं फौज् बानर् अति हरष याना वल वनं ॥२९०॥

जिगू कर्म थौं जा जित थन हया जा बिल नसा ।
वया चोंको बानर् छहा छहा कयावो हय नसा ॥
थथे गृद्धं धागू सकल कपि फौजं अन खनं ।
जुळं त्राही त्राही अन कपित अंगद् सहित नं ॥२९१॥

अले अंगद्जीनं पवन सुतयातं कन खँ का ।
सिताजीया भागें वल थनस पंछीं नय धका ॥
जटायूनं सीता हरण जुव बेले दुख नळं ।
कयावो प्राण् वोया दश सिरह्य रावण् वन वळं ॥२९२॥

हनूमान् अंगद् वो थुलि अन खँ ह्लागू न्यन वनं ।
 जटायू धा ताया बल अन व गृद्धं सुमुकनं ॥
 अहो बानर् थौं जा खुशि जुल जिनं जा छिमि खँनं ।
 जटायू जी कीजा सित धक खँ ह्लातं छिमिसनं ॥२९३॥

व सोगू कारण् छू जित फुक कनाब्यू व खँ फुकं ।
 मफू बोये जी नं पपुति मदु जी सो छिमिसनं ॥
 थुली पंछीं धागू वचन चवन नेना अन फुकं ।
 कृपा याना जीतं छिमिसन कना ब्यू व खँ फुकं ॥२९४॥

नये धाया निम्ति सकल कपि त्रास् चा मनमनं ।
 थथे मननं धा का सिइ धक च्वनापीं फुक थनं ॥
 नसा ब्यूसा भागे थन दक थव बानर् फुक मुना ।
 थथे सल्ला यातं सकल कपि फौजं अन मुना ॥२९५॥

कया पर्वत् ववेसं तल अन व संपाति अमिसं ।
 खँ ह्लातं अंगदनं वइत अन लाका दथुयिसं ॥
 छनं न्यौं संपाती मन थिर तयावो थन सुखं ।
 जुजू दशरथ्जीया परम प्रिय काये छहा दुखं ॥२९६॥

चमा मांया निति पितिन थव देशं सुमुकनं ।
 वया नां जा राम्जी बनस अन वोया दुख हनं ॥
 किजा लक्ष्मण् दू का परम प्रिय सीता छहा दु का ॥
 मदूगू ता सोया रघुवर व लक्ष्मण् निहा थुका ॥२९७॥

हरण् यातं सीता छल बलन रावण् अन वया ।
 अले जा राम् लक्ष्मण् वन बन हिलावो स्वत वना ॥
 वना ऋष्ये मूके रघुवर व लक्ष्मण् निहा हनं ।
 कका सुप्रिब् सीसे चिन अनस त्वाये हरषनं ॥२९८॥

जि बूबा वाली वो परम रिपु सुग्रिव जुल व का ।
 सहाये राम् वोया सहजन पिताजी फुकल का ॥
 उकिं सीता तंगू जिमित थन माय्के हवगु का ।
 कना ब्यू संपाती गन वन व सीता थन खुया ॥२९९॥

थुली नेना वार्ता जुल खुशि व संपाति अनसं ।
 पपू छोया वंगू कन अन विधानं थव ह्रासं ॥
 छको न्हापा स्यातं दवन थन बृतासुर जुळं ।
 जये शब्दं याना जिमि निह्य वना गम्न तु जुळं ॥३००॥

पुनावो सुय्येनं अति दुख सियावो वल हनं ।
 पपूनं तोपूया जिन अन जटायू सुमुकनं ॥
 पपू निष्पां जीगू नल अन रबीया किरणनं ।
 अले शक्ती वोनं कुति वल भुमीसं जि स्व थनं ॥३०१॥

खना जि नं योंगू रघुकुल मणीया प्रिय सिता ।
 धयावो राम् लक्ष्मण हननन खयावो वन सिता ॥
 थनं लंका सोया दश शिरन योंगू जिन खना ।
 मद्द जीके शक्ती छिमिसन खनंका ति थव खना ॥३०२॥

अती दुर् लंका जा प्यसल कवय पागू अन दु का ।
 वना सो हुं छिम्सं खनि अन सिताजी दिलगु का ॥
 पराक्रम् याक्नं वो थव थवगु थम्नं मन तथा ।
 जिनं स्यूथें चों का थन वइ सिताजी अन स्वया ॥३०३॥

थनं खंका बीफू थन थन सिताजी दिलगु का ।
 सखी योजन् पागू जिगु थुगु मिखानं स्वय फुका ॥
 नसा लाया निंति थित जिगु मिखानं अधिक का ।
 खने दू तापाकं अति दुरगु वस्तु स्वयव का ॥३०४॥

छिमीस न्यों बानर् थनस जिन डोंके मन तया ।
 थुगू सागर्यातं सहजन छियेगू जतन या ॥
 अले लंका वोना छिमिसन सिताजी थन हया ।
 जुयेव् कार्य सिद्धी थव पुर स्वयावो गमन या ॥३०५॥

थनं योंका ब्यू का छिमिसन व सागर् तिरस जी ।
 जटायूयातं थौं जल बिय वनावो अनस जी ॥
 थुली संपातीनं मधुरन खँ ह्लागू अन जुया ।
 ह्यायेसं जोनावो यन कपि मुनावो घस पुया ॥३०६॥

मुपार्सो जी कार्ये जित वन नसा मा हितुहिला ।
 वयागू हे धर्म थन जक च्वना नं नय जि ला ॥
 छन्हूया दीने जा निन्हु स्वन्हु नसा नं हय मफू ।
 नये मास्ते वोया तमन जक केने अनस फू ॥३०७॥

तमं क्योंगू चाया स्वव जुल अकासे वन हिला ।
 खनं बूया योंगू मिजन छह्हासेनं अन मिसा ॥
 नसा याये भापा स्वल वल हथासं अनस जा ।
 दुरात्मा रावणनं यन खनि व सीता अनस जा ॥३०८॥

मुपार्सोनं जीतं कन थुगुलि वार्ता थन वया ।
 जि कायेया धर्म जिन भति सियागू थन धया ॥
 थुली धागू नेना अन दक कपीया मन रसं ।
 जुळं तींतीन्हूय! अन दक मुनावो अति रसं ॥३०९॥

सागर् तीरे वनं का अन दक कपितं हर्ष याना मनेसं ।
 जाम्बूवान् अंगदादी सकल दल मुना वास यातं उकेसं ॥
 डेरा याना च्वनं का सकल कपि गणं सिंधु तीरे वनावो ।
 अंगदजीनं मधूरं थवसिन थजिपि वृद्ध मर्कत् स्वयावो ॥३१०॥

सल्ला यातं अमीसं पुचल अन मुना तीन्हुयेगू उकीसं ।
तींगा न्ह्या स्व सागर् गुह्य वनि थननं भि व जा धाय झीसं ॥
सच्छी योजन्त तीन्ह्वी फुह्य थन सु सु दू धा छिमीसं स्व थथ्थें ।
अंगदजीं धागु नेना कन सकलसिनं तीन्हुई फूथ्य फूथें ॥३११॥

फौजे सेराह्य वोया कन गज कपिनं जी वनेफू झियोजन् ।
जाम्बूवान् अंगदादी सकलसिन कनं वोन्य थूली जि योजन् ॥
ग्वीगू योजन् वनेफू धक छह्य वल का बळ् दुथें फूर्ति यांना ।
लीपा नेनं मधूरं पवन सुत स्वया अंगदं हर्ष यांना ॥३१२॥

गूली योजन् वनेफू पवन सुत छनं तीन्ह्यावो थनं का ।
धा धा याक्नं हनूमान् गुलि छन बल दू थौं व बळ् छं पिनंका ॥
आज्ञा अंगदजियागू सिरस अन फया धाल का माहवीरं ।
सच्छी योजन् वनेफू जिगु बळ् उलि दू जी वने सींधु पारं ॥३१३॥

थूली धागू न्यनावो सकल कपि गणं हर्ष यांना उथासं ।
धन्ये धन्ये हनूमान् धक सकलसिनं स्तूति यातं उथासं ॥
याये जिम्सं तपस्या थन गुलि च्वनि का पाद छीनं चुयावो ।
ळंकां त्याहां मवोई गुलि तक थन छं येक भक्ती जुयावो ॥३१४॥

जिम्सं चोने थनं जा थन वक गुलि दू अंगदादी कपीतं ।
धर्मात्मा हे हनूमान् छन जिमि फुकया प्राण रक्षा स्व ज्वीनं ॥
थूली नेना हनूमान् अति मन खुशिनं धाल फौजं स्वया नं ।
मेगू पर्वत् गया नं फइमखु जित वं इवे दुनी जी पलानं ॥३१५॥

थूली धया सकसितं अन बार बारं ।
पर्वत् महेन्द्र गल का हनुमान पारं ॥
पर्वत् चवकास च्वन का अन ताक तूना ।
प्येपां चुया च्वन गुली वन पालि धूना ॥३१६॥

ग्याना च्वनं अन दको पशु पंछिनी नं ।
 लोहं तुला वन गुळीं गुरुरुरु मीनं ॥
 सर्पं फनो पनि कया च्वन थें स्वया नं ।
 ठंका स्वयाव हनुमान् च्वन ता कया नं ॥३१७॥

इतिश्री अमात्य सिद्धिदास विरचिते सिद्धिगमायणे
 किष्किन्धा काण्ड नाम चतुर्थोऽध्याय ।

टिप्पणी:—

१. छम्ह मां व हे या (मूल पाण्डु लिपी)
२. येना (मूलपाण्डु लिपी)
३. दुगु आखः न्ह्यातल । उकिया पलेसा मेगु आखः तने तोफिकातल ।
उकिं कथंहंगु शब्द तनेगु ज्या याना ।
४. थन (मूल पाण्डु लिपी)
५. पाफूवय
६. मूखी
७. (आख निग तोपयूगु दु)
८. (दआख निग तोपयूगु दु)
९. (धो छधो हे तोपयूगु दु)